





572



權載之文集

三



Centimetres
TIFFEN Color Control Patches
© The Tiffen Company, 2007


Blue
Cyan
Green
Yellow
Red
Magenta
White
3/Color
Black

Inches
1
2
3
4
5
6
7
8

續載之文東卷第十三

理鑑


唐書卷之四



天地訪合... 為君臣保大以昭百志其德武功也則有經緯實載之

州... 王昭天師忠武





權載之文集卷第十三

唐權德輿字載之

碑銘

唐故朔方河中晉絳邠寧慶等州兵馬副元帥
河中絳邠節度營田觀察處置等使元從奉
天定難功臣開府儀同三司檢校司徒兼中
書令河中尹上柱國咸寧郡王贈太師忠武
渾公神道碑銘 并序

天地訢合以生百嘉其成歲功也則有震耀肅殺之助
焉君臣保乂以熙百志其講武功也則有經綸翼戴之

輔焉龍蛇起蟄山澤通氣與運相值有開必先斯太師所以宣力四方稽暮七德輝耀威靈勒身濯行霆擊風行乃緝熙於光明故瑀戈淑旂以嚴師律黃流元袞以正台耀湛露彤弓以覺報宴納書追命以榮恤禮藩錫始終如公之功公諱城字某其先夏妣之後爲淳維漢劉之代爲渾邪或強爲與國或分以保姓貞觀中開置州壤就加官師曾祖元慶皇豹韜衛將軍靈丘縣開國伯祖大壽皇太子僕贈尚書左僕射考釋之皇開府儀同三司太常卿兼御史中丞寧朔郡王贈司空惟靈丘紹先公之職居次卿之重僕射以積厚克家寧朔以偉

才雄邊貴仕崇勲乃裂茅社流光追遠是加密印回復介社間生元臣功昭於前人德合於大君建中癸亥翠華西狩公以大司馬艱貞翼從部勤戎車揣摩殺機勤勞行內爲上心膺登壇授律誓命交感如漢拜淮陰侯故事而又加焉乃進左揆遂參大政惣賦輿而爲之師長恢王畧而以之北伐兇黨盡銳臂於武亭公以事鉅師老則傷威重正合奇勝在於疾力奮寡擊衆鼓行無前殲夷潰溺如建瓴水中堅席勝又覆於咸陽長轂啟行旣門於延秋會西平王以東諸侯之師清宮獻捷公乃抑其賈勇須彼成功室士心之尅伐息兵火之氣燄

欽定四庫全書
續通志卷之三
然後窮追斬級寇孽以平備法從於清蹕捧大明於皇
道告類薦功登拜上台撫封尹正復與虜狎時北平王
出大鹵收絳臺而公已總成師下左輔於是輯忠力揚
奇鋒復離宮拔堅壘衝陣壓竟傳於蒲津金鼓之聲氣
相合山河之表裏皆復渠魁授首師帥協附安流以濟
方軌而前士不離場工不易肆二寇正刑四方成和論
道進律乃平水土兼誼靖人以脩班制休嘉貫於草木
利澤逮於鰥寡言爲軍志勤爲吏師貞元景子政成一
紀進掌邦教遂居右弼十五年冬寢病十二月辛未薨
於理所享年六十四皇上悼歎不視朝五日冊贈太師

贈襚吊祠有司備物大僚襄事明年二月甲申葬我太
師於萬年縣洪固原太常跡其功德奏諡曰忠武禮也
初公年十二以將門子仕於邊部未弱冠五遷至左驍
衛將軍始從朔方之師戰黑山次從隴右之師摧石堡
又嘗西出臨洮奪昆夷之善地而爲之壁壘北絕大漠
破獫狁之堅甲而焚其廬帳又從汾陽王臨淮王討反
虜於山東南攻贊皇北取真定射其特將李立節貫於
左肩斃之又五遷至大卿皆以功次其間開地於河曲
以靜九蕃宣威於陝西乃定三川凡王師之所以尅獲
都邑元老之所以發揚蹈厲公必居其先偏而當其勅

劇故以御史中丞爲靈州左司馬以御史大夫爲邠州
刺史以工部尚書單于大都護專征上郡榆林之地入
爲左金吾衛大將軍又以戶部尚書奉普王出車自時
厥後投艱感槩能納大忠以恤大事理蒲十六年再陟
公台以司空兼侍中以司徒兼中書令大凡厯官二十
八次真食千八百室居節制者五副元帥者四材力絕
人始封樓煩方內治平乃進咸寧凡汾陽王九伐之勳
公皆左右四履之地公皆踐厯憫冊師禮法謚尊名公
皆如之時不至者壽而已矣惟公厚性寬中智謀深靜
秉義類以賦明命植端誠以糾王慝講功述職遠意長

利執德之柄蹈禮之輿致其用以格天啟其心以沃聖
協建皇極爲宗工元龜雅好左氏春秋班氏史得考父
之恭范宣之讓驃衛之功晷黃韓之教化又嘗慕太史
公自敘著紀一篇詞不矜大而事皆明備有子五人曰
殿中少監鍊太子中允鎬太子司議郎鉅櫟陽尉鋼雲
陽尉鏃著位於兩宮以奉朝請試吏於縣內以循事任
食德而才稟訓而忠皆以純孝致其哀敬令弟輔國大
將軍右領軍衛將軍武當郡王玘與諸孤等推烝蕤景
鍾之義因職喪以聞有詔詞臣刻石傳信乃採其贊書
侯表作神道碑銘曰

北戴斗極陰方尚武元金朱韜錫命都府太師間代感
會雲雨四征庇人九合尊主昔未成童則能肆勤卓行
深入致果忘身弱冠推鋒環列南軍中與之後書杜策
勲援枹兩河轉戰三秦靈朔郇邠所居必聞出統藩衛
入司微巡時丁阨難節冠羣倫述誅煽結狂穢宮闕西
平鞠旅公亦受鉞旣臨延秋如火烈烈休士退舍時惟
不伐稔沚濛濛蒲津未通北平釋位公實撫封胥命長
春克咸厥功開壁勞軍靡有不同以律則臧在和而克
時惟太師有嚴有翼乃敷仁澤乃布條職時惟太師有
功有德三公二府是獎是陟祿印易名以尊以飾材官

介士鹵簿悽惻大隧鮮原中南之北萬邦作憲永代是
式追琢馨香與唐無極

唐故正議大夫守門下侍郎同中書門下平章

事成紀縣開國男賜紫金魚袋贈太子太傅

貞憲趙公神道碑銘

并序

在漢孝宣厲精理道則有魏相通故事邠吉知大體百
職修明中興有聲惟皇帝在位十四祀得賢相成紀公
趙氏受天清淳佐時緝熙本洪範之正直躬大雅之明
哲右輔左弼調和鼎味降祥而生盡瘁而終時貞元十
三年年六十一皇上震悼不視朝三日詔奉常具儀法

冊贈太子太傅又俾百執事爲位哭於其庭吊祠禮賻
率有加等二府之屬或銘其德於壽堂或狀其行於考
功有司稽實諡曰貞憲公之盛業所謂不朽又舉其始
中終之畧識於神道公諱憬字退翁天水西人其先成
子之文宣子之忠文子之知人左丘明太史公實書之
曾王父仁本皇司列少常伯同東西臺三品以忠清厲
翼多所發明乾封總章之際號爲稱職王父贈趙州都
督諡厯右司郎中乾封縣令司僕少卿烈考贈鄭州刺
史道先仕至洪州錄事參軍惟祖禰含章故慶延追錫
崇構丕矩復大於公公保抱之歲生知色養羈冠之年

則無幼志及夫被儒服踐法言敬直而文肅莊而溫端
誠博物錯綜今古非大中至正不接於心術寶應中元
宗肅宗幸梓宮有司議方中復土之制時西鄙日聳歲
饑人流公以王者追孝恤禮宜儉褐衣上疏詞約指明
君子曰此劉更生諫昌陵之言也息偃江介名聲籍甚
始佐州師乃辟戎車自試守江夏尉三遷至監察御史
其後翹車繼轍賢侯虛左大凡難理之府皆待公爲重
厯殿中侍御史太子中舍丁太夫人憂柴毀孺慕殆將
死孝感導善氣降爲嘉生有芝煌煌秀於壤樹之側公
默而去之人莫知者旣免喪徵拜水部員外郎未幾檢

校工部郎中副湘中七州軍事居一年詔領留府尋踐
方伯以中執法錫金印紫綬罷秩家居拜給事中執法
懷和北狄有下嫁冊命之禮復兼憲丞以副皇華旋軫
未至遷尚書左丞後又用彰皆以貞勝其初撫封上狩
於漢中守臣之任憂寄愈切公恤隱布和仁而愛人與
師知訓善吏樂職行之三年教化明備底貢有藝賦政
不煩潔矩以杜竒表露章而無吐茹飛語雷動明誠山
立受代踰年事實敷聞故有左曹之命講貫舊章惟真
是視刑或失入議將必還公望曰盛其勤靡監故有和
戎之役致賜諭旨協寧殊隣疆場之言專對而不貽紀

綱之僕承事而不征保就安利北方感悅故有在途之
拜整南宮之紀律稽郎吏之功緒風望素重法制有精
嘗歲終舉吏可以長人者或以其細故深詆將以病公
公乃移書自訟請下其考有博大之度無怨欲之私一
臺承式六轡在手持綱體要善否有章故積公輔之望
貞元八年夏四月拜中書侍郎平章事明年五月轉門
下侍郎以厚德載物以全才宣化舉直盡忠數納將明
正百度之本去一朝之便事有統紀心無面從嘉謨匡
言鎮定宏大謙厚而不伐持平而居易閑邪塞違貞厲
而不校陟恪始終帝載用和戲夫先常伯歷左肅機東

臺侍郎克著休功再叅大政公皆踐之是以似之嘗以爲漢廷諸公罕備其用以石慶之醇謹而不能關決薛宣之方畧而失於煩碎翟方進之通明而固其位公孫宏之節儉而近於名公偏有其長彼實多缺唯丙魏所履我無愧焉向使慙與之年盡行其道則公之所化可勝紀乎故其登庸也士之仁者相賀而不仁者相吊其全歸也士之仁者相弔而不仁者相賀斯可知矣至若睦中外之姻而均其祿賜嚴宗廟之祀而不理第室啟手足之日家無餘財奉終卽遠待恩禮而後備難矣哉嗣子宣亮全亮元亮承亮等伯季以門子爲宏文生叔

仲始解巾授祿皆稟德風幼而孝謹以十一月景午時得吉卜奉公之喪耐窆於河南緱氏縣景山之原禮也以德輿叨居宰士嘗辱深知職奉贊書備詳盛烈俾刻金石聞於無窮銘曰

晉有成宣代稱忠勳先正常伯匪躬事君纘復於公爲時獻臣德不踰閑心不違仁貞其所履以翼天子大猶是經中立不倚乃賦明命宜躋遐紀吾道方伸修途遽已緱原蒼蒼宰樹成行名章章樂石在旁噫嘻太傅之風永代不忘

唐故東都留守東都汝州防禦使銀青光祿大

夫檢校吏部尚書判東都尚書省事兼御史大夫上柱國扶風縣開國伯贈太子少傅杜

公神道碑銘

并序

歲在戊寅夏五月甲子居守天官扶風公以病就第考終命於京師永命里春秋七十四越三日丁卯追命爲太子少傅秋七月甲子歸全於萬年縣少陵原前此又詔有司以鹵簿鼓吹飾其儀法以德以勞以榮以哀馨香光大爲宗工表式公諱亞字次公漢建平侯延年二十一代孫曾祖立道皇右千牛王父含章皇上郡司馬贈岳州刺史烈考繹皇忻州秀容縣令贈左散騎常侍

公承積德之淑靈稟中和之粹精山立陽休得時大行
歷諫議大夫給事中再兼御史中丞繇睦州刺史入爲
刑部侍郎三兼御史大夫檢校禮部吏部二尚書正色
於朝而文憲損益懋功於外而藩服輕重宣力以肆勤
納忠而愛人稽於制導以善利魏昭子能理大官趙文
子能恤大事足以斷國論謀玉體殆不可及已早歲州
里舉經明旣授初命以爲大廈之材不可以植培塿南
溟之翼不可以棲榆枋於是初服燕居博通羣書深探
理古之道焯見天人之際天寶末盜穢兩都宣皇在岐
褐衣召見前席三接實貢昌言以扶大統乃以處士授

校書郎其後三辟大府五登郎位請議善價必歸於公
大厯中宰府擅朝交利崇黨司諫八年疑然貞厲盡規
時疾天下直之權臣既誅乃擢左曹先是魏壁未下東
師既老密疏方畧深圖理安再勸皇華大布清問導以
善氣灑其他腸不寧方來克協宸慮故先皇今上皆以
公之才可以大受姑以九牧四征試其多能鍾陵上游
提封七郡命公以廉問之政師役之後因緣煩費雜征
逋賦盡削其書未逾年而庸亡自占與夫家相半能厚
下矣函關陝服介於周秦命公以藩屏之任化用清靜
身爲津度里閤無吠犬府庭無諍詞四封之內幼艾相

賀能去煩矣河靈蒲坂陶唐所理命公以尹正之重地
本沃饒化之純儉盡以解梁之鹽歸於有司凡緡物錢
之息其出地澤之賦其入歲一萬萬率皆罷廢不以利
爲利矣揚州葆強都會庶富命公爲節制之帥日講軍
實歲修職貢師貞人和政成事時河渠填淤積歲爲病
乃釀二浸於蜀崗之西濬舊坊以股引順地泐而啟閘
滌源導滯力省功倍邗溝之人受其賜而頌歌之矣勤
學在公盡瘁其身上思褒優之禮乃命保釐之任皆在
成周三后協心公率其道寬而有制且以洛苑汝墳弃
地可闢藉其介夫頒以稼器歲皆登成人用洽和地官

以之省費游手以之務本分正七年厥後用加徵還京
師日俟其復天則不吊竟孤人望夫人范陽郡夫人盧
氏茹未亡之哀既虞而終無子以猶子某爲後悲夫初
公文章合雅議論經遠見知於太尉房公瑄受辟於衛
國杜公鴻漸以志氣才業英華博厚合於彭城劉公晏
贊皇李公棲筠以道義經術研機盡性合於司徒楊公
綰司業張公參或以公得時中之道或以公有事外之
致皆曰聆次公之言可以書紳作憲至於博約後學章
明遠至有闕里之善誘焉有平輿之深鑿焉噫嘻昔漢
武帝以韓安國爲國器劉向謂董仲舒有王佐之才當

理平之時或蹇或徙止於御史府膠西相竟不得總秉
國成扶贊化育則公之位望終不相配亦如是耶昔魯
視豐碑衛銘烝彝近古鼎不以窆追琢介石榻於道周
參魯衛之遺也公從父弟太子賓客黃裳得位相倫友
悌相輝功衰之喪加人一等以德與辱公之知碑論風
烈懼詞之不敏而無愧焉銘曰

昔在周邦實憲吉甫於惟杜公亦備文武武弁峩峩玉
聲鏘鏘公在左垣羽儀周行鈎膺濯濯文馬翼翼公爲
元侯表率方國推誠導利興事任力陟恪清時作稽忠
德冢宰是職周郊是式宜永介福如何不淑壽堂幽閔

襪印榮飾勒銘於茲山石無極

唐故劍南東州節度副大使知節度事管内支

度管田觀察處置等使正議大夫持節梓州

諸軍事守梓州刺史兼御史大夫護軍賜紫

金魚袋贈禮部尚書盧公神道碑銘

并序

惟盧公諱坦字保衡涿郡范陽人也代爲北州冠族曾祖審經皇齊州祝阿縣令祖河童徐州豐令父巒明經上第贈鄭州刺史仍代以六百石廉厚有循化光君子名經澡身曠僚追命至公始延耀發舒咷赫顯尊乃舉較畧以施金石公始爲同州韓城宣州宣城鞏縣河南

四縣尉監察御史裏行殿中侍御史內供奉真爲殿中侍御史戶部員外郎尋轉庫部員外郎刑部郎中皆兼侍御史知雜事拜御史中丞除右庶子又以御史中丞爲宣州刺史宣歙池觀察使入爲刑部侍郎轉運鹽鐵使戶部侍郎判度支又以御史大夫爲梓州刺史劍南東川節度使元和十二年秋九月薨於位其年六十九公含章特達剛建篤實粹溫而有遠猶忠厚而無流心自周圻滿歲令聲籍甚時宰得君實公之私其燻灼不受慰薦徐用常調復還洛都其仕外臺贊佐東都守臣寢病中貴驕暴以甲士五百棲於府中衆情怪駭慮

有急變公感槩憤怒以正詞讓之匪人慚悔回慝不作其佐轉輸事任循明河之舊防有梁公堰者發決歲久爲之濬理鍾水導滯厥猷茂焉李錡以戎車督運貪猾無狀公端正中立用十年不徙官與從事李約李稜暨今相國裴晉公相繼引去其在憲司貞厲閑邪元和初天子憫人之重困徵貢之無藝方任受代至京師尙修任仕者俾論如法赦令懸焉梁閩二鎮首奸斯禁公立奏劾使待罪於朝多士棟聽四方風動李錡之誅也旣絕屬籍有司請發其先墓自懷安而下悉皆夷之公諫曰神通有佐命勲乃國之宗臣守官以死奈何一旦以

錡故而戮斲九原上改容嚮納特給五家灑掃冥冥之下將加法而加恩君子多之其在宣州歲丁驕亢順其發斂以救艱食濶渚田於墮弃置種食於鄉亭多方愛人人用饒給或曰持力盈矣盍上獻乎公曰動入市恩所不忍也出軍食緡錢四十萬以代征徭爲秋官領使去冗食百輩自江而南均輸池澤委分部大吏得命其屬以能否進退公不撓焉責其成以鶩功吏採其要而得均節其爲地官也以府帑之羨繕終南宮百堵皆興六職以嚴備邊力晉者費大萬兵食以饒亭障以安有臨淮守前涖事於代北者或告其畜馬百駟且有奇種


事下於公公使從事履之上遽命小黃門按之公曰如是則廷臣可疑近習可信臣不敢奉詔疏三上上方感納七年河流毀西受降城城守以聞宰臣請徙於天德公曰河決不過退三四里功費無幾何天德墻礮回遠非所利也時之宰臣議異故公議格而有梓潼之命其後城守以憂死代之者人歸咎而戍之盡屠其家天德幾亂公之前知若蕃蔡焉梓人自井絡挺災侵淫亂畧逮公至也理之如家雜征牟利者去之邊防虛籍者實之底貢之外無異獻吏祿之差有恒給師員人勤政事和理鎮安一方而大庇廕之柩輅之引鰥孤哀送自鄴

中至劍門以五百里祭奠相屬有詔贈禮部尚書不視朝命著作弔祠法贈加數母弟前絳州刺史常師以器望歷中外以友愛重人倫長子玠壽州霍丘尉冢子大琰前明經調拔萃以地勢嫌抑次子大璟河南府參軍幼曰瓚未仕大琰大璟等咨於叔父與伯季竭誠信以明年正月日祔葬於東都穀水之陽先封禮也惟公早精六學尤邃三禮晚節究觀歷代史端誠正議宏達卓越歷於大朝名致直言秉剛履險不疚不貽煢煢然有史鮪汝黯之遺風序賓樹善銳於簡拔同升諸公者十人並列於藩者若干人喜士睦親造次以用之不


求備求之如已失洪範之攸好德大雅之人鮮克舉惟
公有焉某建中末與公同爲丹陽公從事中歲左戶請
爲郎及茲建牙壤地相接周旋出入殆四十年今聖朝
多士如林永懷舊故凋落向盡保衡又沒可勝慟耶公
之記室大理評事羅立書狀公之行將諸無容之請牽
課鄙億詞達而不文銘曰

盧公懿懿戴仁抱義其用不器迺簡在庭大猷是經穆
然儀形再貳六職兩居方國人用景式溟波鄉雲天矯
輪困奮其翼鱗物情未直壽寵未極生死糾纏洛師舊
鄉穀水之陽先人所藏孝子悌弟乾肝焦肺寧此後載

刻飾龜螭發揚聲詩傳信在茲



權載之文集卷第十三



權載之文集卷第十四

唐權德輿字載之

碑銘

唐故中書侍郎同中書門下平章事太子賓客
贈戶部尚書齊成公神道碑銘 并序

有唐文學政事之君子曰相國齊成公諱抗字遐舉清
方粹溫絜矩秉彛明誠盡性切劇化育之道精義入神
旁魄天人之際以忠事君以病乞身乃去台宰乃濟商
皓然後撤琴啟手足歿齒無違德以從先大夫於九原
易名曰成不亦宜乎公某郡人自太公表東海桓公匡

天下爲國爲家或哲或仁烈祖贈太師府君諱澣歷給事中中書舍人吏部侍郎止於平陽太守出入陟降中行山立至今言開元名臣者稱公有遺直遺愛焉實生先公贈國子祭酒府君諱翱履道貞厲仕至左龍武軍倉曹積厚於上流光於下其位不充故大受於成公公旣亂而孤哀過成人屬幽陵橫潰中夏如燬奉太夫人安輿違難於越得子州支伯之故地而偕隱焉誅草茅以順居息悅山水以資仁智方茂天爵用觀靈龜嘉招重問奔走以狎至虛已宏道從容而翔集吳郡張相君鑑方以仁義理濠上得君爲榮及進律於洪成師于岐

累爲命介若驂有靳建中中戎王請大和會以休寧西方扶風綿亘汧隴地當甌脫且有成命正其經界公實佐中權登壇蒞盟得其情數與之約結克就衣裳之會用銷邊鄙之警自解巾三遷至殿中侍御史俄屬涇旅竊發羣凶挺災天子展儀於甸內土公死難於理所百舍奔問至於行宮拜侍御史有詔以蕭黃門復布愷澤於東夏命公爲工部員外郎以贊焉復命轉倉部郎中李懷光阻命於蒲連兵未解關中饑旱經費不足轉粟饋軍濟時之艱患求才急病命使以專達遷兵部郎中兼御史中丞以董其任俄拜諫議大夫當軸者不相容

坐婚親細故出爲處州刺史先是山越寇攘蕩覆城寺公乃卜勢勝之爽塏因習俗之便安三時不害百堵皆作朝典陟明拜蘇州刺史吳實劇部夫田多稼浮徭冒役吏禁或弛占著名數戶版不均公乃閱其生齒書其比要強家大猾不得蓋藏介持單輕與之紓息已日乃孚厥猷茂焉遷潭州刺史御史中丞湖南觀察使以向時二郡之理而宏大之其仁可知也左曹理本徵爲給事中周郊寄重擢爲河南尹盜有宋瞿曇者白晝椎剽爲羣偷囊橐三川病之幾三十年公法令嚴具網絡張設名捕魁宿使無遺類指顧之間擒擿如神乃作秘書

章明文雅脩舊以起廢乃作太常統和神人節事以辯志便蕃大僚其道乃光德宗皇帝方以堯舜氏聰明之道馭天下用賢人充相位拜中書侍郎同中書門下平章事熙九功之歌質百官之成損益文憲化裁形器精微以折中密靜而不伐或事隱於造膝或言行於沃心初天官氏每歲表他曹郎二人閱多士試言第其甲乙春官氏俾考功郎選孝秀之親故者而進退之公以冢宰小宗伯爲官人取士之本蓋天子有司之重任於避小嫌亂舊章適滋岐旁孰謂局鑄蹇蹇坦坦之道豈如是耶然後闢康莊付衡尺遵公是之路去自便之私天

下之人謂之理道尋有詔修國史昔孔父無位以空文
爲一王法公當盛聖之代用宰司愆直筆其於褒貶勸
懼明焉勤慮盡瘁積成寢恙累章乞告改太子賓客遭
罹不淑贈戶部尚書時貞元甲申歲夏四月春秋六十
五夫人河南獨孤氏某官某之女賢明早夭繼夫人蘭
陵蕭氏某官之女仁順有禮法嗣子餗銜恤毀瘠侍公
裳帷以某月日祔於東都某原喪祭哀敬君子以爲有
後惟公深而通肅而寬出處動靜必以中正敬用五事
暢於四支資性儼恪尤長鑒裁在岐也薦齊忠公暎佐
蕭也薦盧恭公邁皆至宰相其他推轂下士爲漢廷臣

成天下重名碩望者不可勝書凡所論著皆研幾析理
宏雅夷遠洪州文宣王廟碑張蕭三相國碑誌本聖人
教化之蹟推大政睿明之道固其性術講貫而發舒乎
斯文文集二十卷中倫體要盡在是矣公薨五年餗調
爲洛陽尉承惟先烈未刻豐碑以德輿夙承湖海之舊
中忝掖垣之屬代日舉代靡形話言獲於遺編實見陰
德顧茲無似有玷知人濡涕含毫以表幽宅銘曰

昔在營邱大風泱泱有倬平陽令聲章章不踐宰政慶
貽子姓倉曹舍光大學追命厥生中書秉哲居正鵬起
扶搖鸞翔慶霄乃登紫微以瑞清朝吉凶糾纏寒暑結

輜其生有涯其用未極壽堂冥冥宰樹森植揭茲馨香
終古是式

唐故中散大夫守尚書右僕射上柱國賜紫金

魚袋贈太子太保姚公神道碑銘 并序

公諱南仲字某吳興武康人姚虛媯水根柢峻茂後漢
青州刺史恢始違難東徙周華州刺史北絳郡公僧坦
以行義道術聞生一才子曰察曰最仕隋爲蜀王友王
友六葉至公會王父績仕絳州曲沃縣令王父元宋州
宋城縣令烈考發天寶中舉秀才十上不合慨然自奮
從西平王哥舒翰於隴上積功勞至右領軍衛將軍他

日以公之勤贈國子祭酒公抗行厲操清方謙讓以規
爲填以禮爲興以多學爲富以不貪爲寶絜如大圭鑑
若黃鍾宏毅以任重溫良而能斷自射策筮仕至於綬
吉祿啟手足由是道也其初應制條對理道授太子校
書內史史師表其才能凡三結黃綬至萬年尉前後考
課爲府中最擢拜右拾遺久次歷右補闕祭文石封阜
囊諷議十年彌縫百度大歷中中宮憫冊旣卜壽原陳
古義以上達疏近郊之非便即日詔可下其章於宰司
特超五階被以命服執事內詔以上賀近臣修職而競
勸服薦紳者誦之執簡記者書之尋以本官充理匭使

今皇上嗣位之初慮化不下究以通邑長人導利之源
出爲蘇州海鹽令韓晉公滉時愆方任延於幕庭改殿
中侍御史興元歲大輅省方深燭理本束求俊又徵詣
行所泊清宮旋躡拜左司員外郎紀綱品式練達明備
轉兵部員外郎時武師告成祲疹肅清四征羣帥條上
功級材官勇爵差次賞典受命顓達疇庸式敘遷木司
郎中凶旱之後被邊艱食近關蒲晉十餘城之地因其
徵令悅以平糴乃董使車羸糧息人拜御史中丞歲中
換給事中正色匪躬清公不苛大朝以肅左曹亦理明
年授同州刺史三載考績復以御史中丞領陝府長史

陝虢觀察使居五年就加右散騎常侍左輔有離宮公
田之劇焉陝服居函關砥柱之衝焉於二千石元侯之
選斯近而重賦政廉平馨香流聞以修班制以厚風俗
上以靈昌居兩河之郊鄭爲支郡是皆要害且今勁兵
處也自丞相魏國公政成人弼厥後守臣再物故而魏
公之澤寢遠思得寬明忠智之長以輯柔之進公左散
騎常侍御史大夫爲滑州刺史鄭滑節度使於是握兵
符乘單車惠然簡易入布條職恤鰥寡用仁制強禦用
明居常以柔克臨事以貞勝士吏悅勸夫家寬息阜俗
成師納忠閑邪衆情皆懽而公益厲十六年介圭來朝

牢讓師帥由是詔魏公以左僕射居相府命公爲右僕射以代焉公旣得請命其軍司馬盧羣以代焉爲仁由己是稱方國之表知臣若君乃虜師長之任詔奉常具儀法以蒞中臺禮官贊引宰政爲客諸曹羅拜於堂下郎吏捧牘於階序禮成渥綬秉直者榮之虔奉朝請恪居官次慥慥然守業修職未嘗以耆碩尊禮自處山甫之匪懈考父之益恭古人與稽華髮彌固十九年秋七月乙亥感疾薨於宣平里享年七十五天子廢朝悼歎俾中貴人弔祠追命爲太子太師恩之所加可勝言哉惟公粹和而能貞厲恬淡而有儀矩履方持重坦坦光

大詩云愷悌君子求福不回言樂易而不違於道也又曰靖恭爾位好是正直言遭明君其道行也斯二者君子謂公得之夫人河南縣君元氏魏景穆帝之裔宣州錄事參軍光宗之息女也和易淑柔以肥家道先公而歿十八年矣嗣子太僕寺主簿宏絜清好古誠信得禮與其弟亮茹毒問卜以閏十月己酉奉公之喪舉夫人之殯合祔於少陵原黃渠里以儉襄事率循家法雖宗姻四布皆泣而辭之且曰理命也猶懼先人懿實寢而不章刻茲穹石以永終古銘曰知百事尊人淑問黃目鬱器禮神所貴珮王金龜君子是宜秩秩姚公其

心秉義抱義戴仁造次無違公之所履中立不倚廉車
淑旂所向風靡政無吐茹道若砥石事君愛人斯謂至
矣中臺崇崇端右宗公皇明嘉獎陟是師長卓爾道行
倏焉化往少陵鮮原美楨新阡龜筮告猶塗芻儼然白
驥蕭蕭黃渠潺湲姚公之德今揭此貞堅

唐故太子右庶子集賢院學士贈左散騎常侍

王公神道碑銘

并序

興元元年春二月太子右庶子王公艱貞歸全於京師
新昌里夏五月王師震耀祿沴銷散天子以公忠義風
節可以聳厲人臣追命左散騎常侍且詔有司護葬加

禮冬十一月寧神於咸陽縣肺浮原先公之兆域既葬
十二歲其孤仲周以德輿昔在羈州獲見於公無容之
敬嘗拜牀下乃泣狀代德俾表識於神道云公諱定字
鎮卿京兆人其先魏信陵君無忌之後秦滅魏謂之王
家周太尉尚書令罷以勲勞閔闕爲藩衛威重從太尉
三代至隋司金上士洛相等七州刺史明明生進進生
同州河西縣令喜喜生蒲州刺史贈禮部郎中慶慶生
吏部侍郎揚州大都督府長史贈禮部尚書揚州大都
督府易從積是德善叢滋章大公卽尚書第若干子弱
冠游太學舉進士甲科補太子校書以文雅德器名聲

四暢屬執事者用喜怒爲刑賞上蔽天明婚親坐累微
文痛詎歷湘潭藍山雲夢鹽城四邑之屬天寶末違難
家食於淮湖間四征五府聘問狎至某年中書元載廉
問九江表公爲介授左驍衛兵曹參軍以疾乞告不屑
就無何元拜小司徒執憲乘輅實顯徵令復表公爲大
理評事捧詔踵門詞禮皆切不得已而從之恥驚功利
每稽中正酌重輕之法通方圓之宜叩雖應於春容技
寧投於肯綮纔逾旬朔復以疾辭時薦紳先生多游寓
於江南蓋簪清議以天爵爲貴退然絜矩名動京師宰
司得君且務樹善俄除監察御史不樂拘屑換太子司

議郎公望宸盛徵書累下朝論以九遷是望大僚之七
發相繼拜起居舍人尋加理匭使歷禮部吏部二員外
於是昭法誠廣聰明裁百辟之章疏助九流之刀尺私
回屏伏公是興行遷考功郎中每歲覆羣吏之能否書
其上下之籍有司賦祿此焉質正吏詐諉以嘗巧法靡
密而不勝公乃大爲之防盡去其弊是歲選部以稱職
聞或賀之者舉手曰此考功之力也豈敢攘善尋以本
官知制誥歲中遷諫議大夫掌誥如故且加命服凡贊
書名命必輔以精識其旨在於擿菁華而去枝葉故簡
實體要不爲曼辭明年宰臣伏法移太子洗馬今上嗣


統東求吏師授隰州刺史以南宮歸重尋拜吏部郎中再受面命循行方國初自淮淝至於汝南後自上黨亘於山東辯逆節以致誅宣王澤以宏化德立刑行時公之功遷太子右庶子集賢院學士或歎以才全位散非公所宜者公蹴然曰此予仲父之職官也竊懼不稱豈必使濡翼腊毒然後爲得耶明年冬上思避狄之亂王虬西狩公間挈二子奔扈行宮在途發疾爲凶黨所得不敢加害劫送東師无惡借公素名汙以右職桀友日至盜言孔甘不時赴就期以大戮公瞋目噤口其心確然私謂所親曰忘君恩以苟生非忠蹈賊刃以誅死非


孝於是藥攻六藏艾灼四支耗其神形終啟手足任重道遠君子以爲難前此理命其子曰吾嘗被冕服近天子之光不能酬恩刷恥而遭罹執劫得正而死猶生之年但慮竊國泉以賄我義無所受又勿使僞命汙吾之旂口占遺表言終而絕禮盛服充追崇身後君君臣臣其至矣哉故尚書吏部郎中趙郡李公洎公皆德輿先大夫之執也李公嘗稱公交道之深評議之正天下之人以爲知言前夫人京兆韋氏刑部尚書贈太子賓客堅之女繼夫人隴西李氏右金吾衛將軍安州刺史延業之女龍旗麟趾之慶鍾於淑哲皆叶公之志而先公

之歿長子逢以進士宏詞甲科歷咸陽萬年縣尉監察御史殿中侍御史佐制河東之畫才名休茂不幸早代幼子仲周亦以進士甲科使車交辟以廷尉評攝監察御史佐元侯外任實亦功利用敏識文行修明論譎先烈炳然詳實故採獲始終用成斯文銘曰

大玉孚尹慶霄網緼有倬王公清方直溫考績中臺吏理有倫密侍右掖化成人文時或屈伸道無緇磷別殿清近東朝顯尊盜泉滔天猛瘕猖獗不虧其全不害其人凜凜風節追崇厚恩密印金貂禔於墓門家法憑厚慶叢後昆纂敘清輝敬而不諉崗連夏屋木拱秦原傳

信貞珉令聲無垠





權載之文集卷第十五

唐權德輿字載之

碑銘

故宣武軍節度副大使知節度事管內支度營

田汴宋毫潁等州觀察處置等使金紫光祿

大夫檢校尚書左僕射同中書門下平章事

使持節汴州諸軍事兼汴州刺史上柱國隴

西郡開國公贈太傅董公神道碑銘 并序

漢興五代孝武思理膠西相陳天人之際王道之端昌
言大對統紀條貫純嘏積厚遠而寔明帝唐九葉順考

古道隴西公都將相之重承尉衛之崇啟心宣力作率慶事陟恪宗工能積其烈公諱晉字混成河東虞鄉人廉忠溫厚絜矩通理秉義以立故不爲利疚知動之微故每與吉會初肅宗受端命以合兵車思欲去元元於湯火致王度於金玉以文告威讓遠猷密命之爲重也故公解中披荆校文視草凡三徙官被以采章代宗御天下乃清吏職以爲文憲彌綸陪貳事任百辟交修則理道洽故公再入御史府三爲尙書郎歷祕書監長府奉常武侯之亞今上建皇都以纂鴻業思代天工俾寧方內故公出入屯夷昭明有融中居大僚以至柄

用貞元五年春二月拜門下侍郎同中書門下平章事居五年除禮部尙書用耆碩俊德轉遷兵部分正宏化以本官畢命爲東都留守東都畿汝州都防禦使安危注意以左揆持相印充宣武軍節度汴宋毫潁等州觀察處置等使十五年二月丁丑薨于位享年七十六罷朝三日追命太傅有司易其名曰恭惠職喪法賻皆峻奠等所以視其踐履而加優之也初公以祠部郎爲出疆從事北方之疆驕蹇沓貪伐功怙力徵我厚幣使臣指顧公攝其詞詞達氣直虜皆震伏輝威命於專對輝光華於外區仁者之勇沛然餘力其爲大府未浹日而

理乃珥貂蟬實兼憲丞含章以承顧問秉直以司紀律
修起故事京師肅然其爲華州徵赴行在以祭酒亞相
使于北河其往也薊門不出關東多壘習俗故態且相
附離公則破其從約使循軌道其還也蒲坂旣阻王宮
未清婪婪二逆恣睢相合公則折其兇謀因以鬱沒憑
軾有勞扈蹕而旋益用尊禮大其職業司徽循也五稜
嚴備持重而不苟處綱轄也六職遵修舉直而不紊典
禮樂也百神咸秩薦信而不黷其爲相也上戴元聖下
熙百工柔惠小物協寧大政推明常古之制章叙理平
之業粹和而不耀敬讓而不居言陳於前不可悉數拜

章八上然後得請其撫封也尤爲難理先是在宥推恩
參授兵柄至有恃凶器以邀好爵者氣燄不還風波相
浚是邦再亂人用恟恐上以爲陳留天下之郊也非素
重臣不可以率先賦政公旣受命與一二從事記室儒
服而前不待裏言不持扞衛寬信夷易闡然風行長城
大蔡蘊在靈府悍將伏罪齊人樂業四隣諸侯折中於
公居四年政成疾力累求入覲因條陳利病請制於未
然上難其繼以至沒代嘻夫一邦之人得公而理失公
而亂怯介夫殺大吏猶原滌川潰於不可遏向公之嘉
猷密䟽如前知焉其明智歟董氏在春秋時書法不隱

在戰國時贊明命聞於諸侯自膠西而下淳耀滋大在
魏有司徒昭在蜀有尚書令允扶義納忠以幹機衡其
族舊矣公之曾祖仁琬皇梁州博士祖大禮贈右散騎
常侍考伯良開州新浦主簿贈尚書右僕射三代有令
德而無貴仕蕃祉所鍾發爲追崇宜哉有子四人秘書
省著作郎全道秘書郎溪大理評事全素太常寺太祝
澥等其承學也專其就列也敬斬焉而孤纍然以哀日
於先遠象數協吉以其年十月丁酉奉理命家法薄葬
公於河南縣万安山之原以前夫人南陽張氏繼夫人
京兆韋氏祔焉從周禮也惟公自筮仕至捐館四十五

年無伐善無違德歷官三十六皆以理効聞自建中以
還居中分間再調鼎實一人而已范文子所謂唯厚德
者能享多福惟公有之全道等猶懼懿鑠之不永于後
與陵谷之有遷也以德輿奉行公之命書者三宜金石
刻故跡其誄謚而爲之銘其詞曰

后王財成雋乂昭明以建皇極甫申居內方邵理外周
邦是式於惟隴西求福不回文武宣力調和公餼整訓
長轂柔惠且直膠西章章道可佐王屈相下國綿代儲
慶至公乃盛位實配德子子干旗昔往浚都俗旣舒息
翻翻素旗今旋洛師人用悽惻惟是壤樹資於四布万

安之側德輝在茲永代有詞于以象刻

唐故四鎮北庭行軍兼涇原等州節度支度營

田等使開府儀同三司檢校尚書右僕射使

持節涇原諸軍事涇州刺史兼御史大夫上

柱國南川郡王贈司空劉公神道碑銘

并序

維南川郡王諱昌字公明貞師于安定十六歲歲直鶉
火夏五月甲子寢疾病考終命制誥繼以司空印綬而
弔祠法賻稱焉於是內子諸孤宗姻家老盡誠信於內
從事大吏倫侯亞旅展匍匐於外叶志會事拂龜露著
象數皆得條陳纖微必蒙於可報以冬十月丁酉返真

宅於京師某原禮也公之先彭城人楚元王交之後蔓
國公宏基之族孫也大王父全慶皇汴州別駕王父達
徐州長史父庭玉試太常卿贈徐州刺史三代醇靜不
躋豐祿故天爵覆露發祥於公公角犀鸞領魁岸碩大
思暮泉深盛氣陽休清明以虛受莊重而強立稟於端
誠之謂義發於慮憲之謂行顯揚天聲之謂武節修方
在之謂文事再居陪卿三佐列藩以官尹中執法以騎
省亞丞相冬官宗伯比踐六職再受鉞而一撫封列王
爵食真賦終於端右飾以論道其初守商邱援彭城下
濮陽壁寧陵釋陳圍復梁野皆急病肆力成功自著起

沮傷以奮擊化恠駭爲休寧其守不可拔其功不可遏
投艱而智勇俱殪酣戰而奇正合發兵法曰有必勝之
將書曰存亡在所用其信然乎始從河東節度張介然
東討林胡殺畧居多次從宋州刺史李岑扞城半歲劇
賊遁去又從臨淮王光弼汧國公勉每用上効楊于軍
鋒洎劉司徒元佐始權節旄錫宣武之號以族屬勳力
賈餘無前凡希烈之自寧陵走汴自汴走蔡以至于死
皆公之爲貞元三年以備師八千承詔護塞亦旣旋師
俾營甸圻有尤違者連斬以徇天子壯其忠槩未幾徵
還沃心前席享醴命宥建行師之節制自稟新書分上

相之賦輿留屯便地明年正月進律作藩彤弓元甲物
采備厚因六郡之氣俗用十連之教理入觀宣室請城
平涼屹爲巨防乃拓故地而又險走集以禦寇徙邑居
以便人夷堯塢而制井疆斬荆棘以列達市貨力具舉
農戰交修邊關弃地晏然富殖長幼養老沛然生聚隣
有墜師者濟之弃甲者納之凡涇人之所未習者皆優
之爲涇土之所未產者皆茂遂之昆夷攝馨燿火訖息
彼西土軌道繫吾謀實然理民不忘於信賞遺章備見
其忠悃年止六十未極壽寵皇帝之所以恤然加等良
有以焉夫人吳國夫人陸氏柔嘉綢直婦道明備長子

殿中侍御史贈潁州刺史均教忠能仕不幸早夭嗣子
右威衛騎曹參軍士涇懋善有馴行與支子右衛率府
兵曹參軍士慘洎士良及士和等以德輿嘗受面命類
涇人聲詩馨香始終其傳信也熟將篆樂石載徵菲詞
曰

臺臺南川得時經武大君有命式是西土西土濯征衆
心成城壽甲凋戈涇師以貞隼旗鷺冕涇俗以寧肆厥
忠力秉茲義程凡在五符至於白徒制爲日廬亦有賈
區實墉實畝交贊令圖嘉生油油比屋愉愉昔誓偏師
士皆致果如使臂指可蹈水火孰云危事決勝在我狂

瘼內訌惡氣濛濛濁河而南或守或攻陳壁旣捷夷門
乃通時惟南川實冠羣公乃分兵符乃鏤鑿器服物昭
庸天休滋至勞勤心力宏大功利師則嚴終公惟盡瘁
智氣冥冥發揚昭明下平水土上助威靈輅葆參差封
邱崢嶸立此堅石於昭厥聲

唐故劔南東川節度副大使知節度事管內支
度營田觀察處置靜戎軍等使光祿大夫檢
校尙書左僕射使持節梓州諸軍事兼梓州
刺史御史大夫鄭國公贈司空嚴公神道碑

銘 并序

昔周以淑旂錫韓侯奄受北國晉以黼冕命士會乃將
中軍惟鄭國嚴公諱礪字元明再總方任實顯兵柄采
飾昭融與功化俱初公從祖兄太師馮翊忠穆王政成
于梁勲在盟府公以支郡二千石護和門賦與太師既
歿德宗命公爲代於是都尹守開幕庭佩亞相之印綬
建元侯之麾節守之以義和之以仁器局宏厚姿儀碩
大每務根本不沽名聲勤身七歲績用大洽優詔就加
禮部尙書永貞紀號并絡上變軍司馬因守臣之喪席
凶器以要好爵而又劫蜀人圍梓潼天子旰食西南愁
擾公毅然飛章條上方畧請以漢中之師率先進取畫

山川之阨塞調餽饋之名物出其不意可以鼓行嘉猷
急病慷慨忠壯實蒙可報克厭帝心乃命將嚴秦授以
機畧自漢源至神泉凡數十合其間下劔門覆盪口收
劔川破契丹命裨校可提彌誅斬虜之特將文德昭然
後分秦險阻潰其心腹或設伏以遮擊或出奇以夾攻
我常賈餘而虜始奪氣以至于援鹿頭清岷峨旋禁旅
於天上快靈誅於闕下賦車馬以懸束備糗糧以飛輓
慮之於始倚以成功故墨詔曰士季定尅蜀之謀叔子
建平吳之策惟君知臣其至矣哉公博貫書術研機易
象始以處士詣草堂禪師無相修桑門之法邦鄉督勉

甫釋巾褐爲梓州元武尉本道表爲遂州兵曹掾大厯
中西戎不虔疆場大駭領偏師援灌口實茂厥勞謙卑
不居建中末太師以藩衛之崇當孝文省方之運推擇
從事導迎屬車豈伊異人在我族類拜大理評事充節
度巡官儲待百年以奉行內轉大理司直改華州司兵
參軍節度使李元諒署爲推官以憂去職旣除猶毀大
師以武備爲重將才實難表爲太子司議郎兼監察御
史左廣之戎政轅門之後奄無不綜焉俄拜興州刺史
寬明簡惠以靖邊部居一年政成復修軍志終繼二馮
之化而居八命之戶投艱履險勲伐章灼蓋裕於才能


而推於忠厚然也元和元年遷尙書左僕射三蜀旣平
拜梓州刺史劔南東川節度觀察使且以資陽陽安等
六郡四十餘城隸焉加地進律疇庸之典也四年感疾
春三月甲申薨于理所享年六十有七追命司空弔祠
有加嗣子天興尉公甫銜恤茹毒奉公之喪以其年秋
七月辛酉葬于京兆萬年縣鳳棲原從象數之吉也惟
公之先自兩漢二隱湛冥善閉會王父哲閱覽博古鬱
爲閭人阜囊危言劘切后黨縣荆王府司馬出爲劔州
刺史因徙家鹽亭而休老焉大父順恬淡不仕父審微
義方貽訓聖朝以孝理天下贈工部侍郎公之諸祖父

或者作秘書侍講東朝或含章射策剖符居部羣從兄弟有太師之烈焉其他履臺郎二千石者率以才行自贊惟公以文無害歷掾吏部從事發揚武毅奮迅軍籍分闡授鉞爲時信臣循理遵職好謀善斷明利害之向習俗化之變司馬遷所謂扶義倣儻不令已失時其有功名也宜哉林鍾烝彝先古之制所以論次懿績章明永久門吏孝子之心也其可没乎以德輿嘗志太師之墓亦草輿州之詔耳目事實其詞不誣是焉篆刻以表神道銘曰

地中有水利用行師於惟鄭公藩屏清明蜀川橫潰入

用恠駭公披肺肝請掃蜂蠆賦車誓衆沐浴齋戒吉語日聞嘉猷是賴以犒以饋間關感槩如飛如翰燿耀宏大旣理漢中乃遷梓潼武以貞師文以撫封八旒七章旣長宗公乃倚乃伏如何不淑樹檟蒼蒼墓門肅肅立茲介石永表陵谷

權載之文集卷第十五



權載之文集卷第十六

唐權德輿字載之

碑銘

唐故楚州淮陰縣令贈尚書右僕射王府君神

道碑銘 并序

天球白珩產於崇山叩之而清越格人莊士生於積德
用之而宏大其或含光不耀藏器不發乃熾而昌是滋
百祥蘊而為義方飾而為徽章故太原王公四萃仕而
領通邑五追崇而登端右循政茂於官下湛恩集於身
後有繇然也公諱光謙字某自東漢鴈門太守澤五代

至晉中書令獻公坦之歲黜德名與吉祥侔盛自後魏
龍驤將軍長社穆侯慧龍五代至隨祕書少監邵以勳
華文學復大其門祕書生隨揚州戶曹參軍東戶曹生
皇青州司戶參軍子奇司戶生美原丞贈太常卿慶賢
三代沉晦邁其風訓公即太常府君之長子也幼而岐
嶷長而淳懿絜矩慎獨抱仁戴義閱深博辯之學稽古
禮文之事炳然含章靡不通貫至若文舒之清修廉實
處冲之剖析元微安期之宏恕懷祖之沈靜合是家法
而躬行之始以門廕受署凡四徙官曰幽州三水潞城
二主簿絳州萬泉縣丞楚州淮陰縣令所至之邦二千

石必加禮慰薦而公牢讓勇退卑不可踰又爲縣令也
務清靜之理而去其煩苦推明誠之本而教以廉愧一
同熙熙生殖阜滋楚風丕變幾至齊魯因喟然曰彼天
爵美祿者在仁義與樽酒而已太邱彭澤豈多秩耶於
是放懷於外嗇神於內沉研象繫之表磅礴天人之際
其致知格物不可詳已以開元二十九年春正月捐館
舍於淮陰年六十九其明年返葬於河南府偃師縣北
山之陽夫人博陵崔氏贈博陵郡太夫人繼夫人隴西
李氏後夫人同郡武氏贈彭城郡太夫人飾終三加子
貴故也公之才子五人長曰翊以文雅典憲直方貞厲

歷御史中丞左散騎常侍刑部吏部二侍郎御史大夫
贈戶部尚書謚曰忠惠次曰翽吏理詳明官河南府陽
翟縣丞次曰翽循良愷悌勲德茂盛歷辰朗容三州刺
史容管經畧使兼御史中丞河中少尹朔方節度留後
汾州刺史單于副都護振武軍使徵拜京兆尹尋兼御
史大夫再居大理卿爲福建州觀察使入爲太子賓客
貞元十二年檢校禮部尚書東都留守踐履藩垣逾四
十年階至特進爵封本郡次曰向士行清修爲秦州上
邽縣尉幼曰翽文敏幹俗歷監察御史三原縣令著作
郎太子僕翽向皆不幸早夭翽亦命屈其志而忠惠公

太原公摠集休祉爲宗公蓋臣初忠惠公與肅宗代宗
從容言天下事甚衆且曰文致太平在正名百職危言
悃悃痛詆權倖條疏理道坦然章明沃心前席倚以爲
相者數矣雖位竟不至而其遺風直聲暴乎天下太原
公剖符賦政累刻金石滅夷越劇賊開地靖人倅蒲也
以沉機銷急變護單于也以尺書柔犢俗中外官師淑
聲流聞保釐尹正式是東夏安危注意未始有極言代
德者以公之道未光而慶下鍾惟其有之是以似之之
故也初以忠惠公扈鑾輅於岷峨其勤匪懈贈公隴州
刺史又以持節印冊命專對於北方間關忠力再贈公

秘書監後以太原公南服嘉庸三贈公爲兵部尙書以
轂下肅清四贈公爲太子少保以閩方報政五贈公爲
尙書右僕射噫嘻賢人教忠之業令嗣揚名之孝大君
追遠之澤是三者可謂至矣十七年太原公貞于龜筮
得二月壬寅吉於是備八旒七章鸞冕佩玉之飾博陵
彭城二郡太夫人以象服祔焉詔給鹵簿官司喪事慶
靈集於一門光耀被於九原君子然後知積德豐報之
不誣矣至若忠惠之子爲守臣太原之壻居台司諸孫
昌阜冠聯圭組則列諸碑陰以備代家斷此琬琰銘公
德善其詞曰

有斐君子兮德行醇備蟬聯咺赫兮峻閎宏義觀我靈
龜兮懼腊毒之厚味樹風百里兮馳蒲密之極摯慈和
安靜兮闔境如春仲曼容兮與古爲倫全才不耀兮流
慶後昆忠惠旣沒兮太原顯尊五加追合兮賁此元壤
隼旗龍劔兮以至師長澤流根兮恩瀾泉壽堂拱木兮
橫蒼烟隨武可作兮臧孫有後崇崗樂石兮昭晰悠久
吁嗟王公斯不朽

唐故鄜州伏陸縣令贈左散騎常侍王府君神

道碑銘 并序

國家以孝理天下褒有功之臣寄崇元侯及先子印綬

名器賁於冥冥繇是王公三受追命有金貂附蟬之飾
公諱崇術字敬方其先太原晉陽人晉司徒渾之後也
中以閹闔徙於帝邱今以名數籍于轂下曾王父皇集
州司倉參軍元素元素生朝散大夫滑州渭南縣令瓌
生蔚州司法參軍宏効皆用儒行自守故纓轂未華仕
不過郡掾史縣大夫而休問四暢公卽司倉府君之子
方嚴密靜忠厚温克覽六籍三畧如古人心開元中
舉孝廉仍歲爲有司所絀因罷卷慨息慕班超傅介子
之爲人遂從河西節度杜尙書暹撫劍相合一命昭武
校尉蘭州金城縣別將再命鄜州修武府左果毅都尉

伐謀決勝多以咨之居戲下數歲因喟然曰務功伐而
違敬養豈吾之心耶陟屺倚門慈戀交感及嘉仲由而
罪吳起去危事以承歡顏旣至郡按察使表其義風可
移於教化有詔試守鄜州伏陸令爲之三年禮俗休和
入爲怡聲出有循政熙熙然千室以仁遂焉雖宓不齊
之理單父庚桑楚之居峴嶠不是過也察廉薦延者方
因公以俟上賞俄于太夫人憂喪期斬焉闕而猶毀又
喟然曰嚮所以不擇祿者備膳羞耳今則求志豈斬畜
於樊中耶於是善閉以葆其身教忠以大其門語仁義
於燕間集寵嘉於後昆以天寶八年春正月考終命于

濮州濮陽縣享年七十二嘉耦北平田氏夏州司馬藝之息女淑慎柔正宜于家室後七歲没于徐州有子三人長曰奇哲倣沉勇與河內尙衡扶義于河南積功榮至恒州刺史蹈難以没不害於仁次日棲榮亦以忠力策謀至左威衛將軍幼曰棲曜寬明博大有文武畧左右征師炳著武功掃蠱毒於姑胥靜鴟誼於夷門興元元年以太子詹事加御史大夫繇太原縣侯進封瑯琊郡王貞元三年從晉國韓公來朝京師拜輔國大將軍左龍武軍將軍明年又以御史大夫爲鄜坊丹延等州節度觀察等使十二年就加禮部尙書納忠服勞考

禮修職克稟風訓爲時翰垣旋觀賦政之府乃公筮作之地感霜露於怵惕展蒸嘗於吉蠲蓋貽慶考祥必有所自不然何回復宏大於是邗耶初大曆十年朝廷以尙書偏師策勲贈公開州刺史貞元九年又以撫劍宣力贈公宋州刺史是歲天子以一純二精大饗報本其明年贈公左散騎常侍夫人始贈北平郡太君再封北平郡太夫人至是三加爲燕國夫人十年十月追錫之車服器用改葬之祓禱合祔濮陽縣洛城鄉全義里之西原先是尙書旣得吉卜如始居喪之戚累章請乞親壤樹上以戎闡委重俾其子正元往襄事焉噫嘻追養

繼志有哀有敬義方啟迪之遠纂服裕盡之盛蕃衍昌
阜叢於子姓宜哉斲石舊封以摠德善其銘曰

仕不必貴難乎求備抑抑王公修仁踐義式昭再命宏
厥武事美化一同炳然文理燕居就養消息恬智從心
之年亦已過二沒代流慶密章下賁此追劇藩乃進常
侍婉彼燕國柔嘉樂易光叶闔門克昌後嗣蟬冠象服
同穴茲地金石繫辭式昭遺懿

唐故通議大夫守戶部尚書兼御史大夫持節

充朔方鎮西北庭興平陳鄭等州行營兵馬

及河中節度都統處置等使兼管內觀察使

權知絳州刺史賜紫金魚袋贈揚州大都督

府李公神道碑銘

并序

周道親親夾輔王室分唐叔以懷姓九宗職官五正故
其後文侯受相鬯之命文公受大輅之錫祿勳推恩敦
叙昌大理道之所繇也國家憲章文武選逮明德元功
侯籍延耀本枝初太祖景皇帝之支曰鄭王亮實生淮
安王神通用親賢功德左右休運淄川郡王孝同淮安
之昭也右衛將軍燧淄川之穆也劍州長史贈太僕少
卿廣業承祖禰積厚之慶而生尚書尹三王都惣六師
帥八命四履投難服勞有猷有守以至歿代禮賁於追

命澤流於代官有由然也尚書諱國貞字南華天姿風采爲宗室儀矩列如寒泉疑若崇山修身筮仕動有休裕開元十三年明皇帝肆觀東后柴于岱宗以公族侍祠調補綿州參軍事暴雨忽至江流美溢公自下位能禦其災既堅舊防乃復故道累遷岐州錄事參軍太師苗公太尉房公繼爲二千石皆所引重御史大夫張倚採訪關中表爲支使天寶末林胡覆三川犯秦關詔除殿中侍御史爲襄陽郡司馬且介戎政公以侍板輿辭革車換房陵太守表課尤異徵拜長安縣令風政肅清改秦州刺史命或中止復爲長安令尋遷汴州刺史未

及行復輟爲京兆少尹天子以公積有試効可居大官累命爲河南京兆成都尹劍南西川節度使其撫周郊狻猊方熾公與太尉臨淮王議曰河洛爲天下衝且無車賦比屋安堵寇將甘心焉不若虛其邑居挈以駿邁羸糧善地可俟師期繇是太尉壁河陽公次于陝伐謀消患君子推其智其在京轂兵火之餘人命將沈一作泛物力亦屈而百役煩苦出於傷痍公曰元元愁歎受命惠養儻不能曠然丕變豈副明天子鬱悼之心耶列上蠲除悉蒙可報凡調於人者去其十九清淨愷弟百姓稱其仁鎮岷峨裔人樂禍殺嘉榮二州刺史以開邊隙

公命將疾攻舉無遺類明年昆戎圍我三城遣銳師據
便城壁戒嚴持重徼其極而擊之賈餘無前酣戰盡殪
悉獻虜獲軍無私焉隣壤不靖偏師叛換將盜兵符已
據城寺出車歷境指顧而平凡三整武經而巴蜀軌道
拊循安重四封畏其威柄用者沮公勳猷徵爲殿中監
命書旣下不俟駕行囊被單車無道里費取倍稱之息
五萬甫達京師上嘉而賜之俾折其券寇有段子章者
恣睢就戮方帥以吉語聞詔公宴見前席獎與曰利兵
積穀皆卿之素也其無駭卒父之謂乎朝野嘉其首公
而服其絜已臨淮王移鎮海岱長轂在郊西邊北朔合

淮陽折父五諸侯之旅主盟中權盡護諸將於是拜戶
部尙書河中節度都統使又以職顯戎重則風俗不阜
加管內觀察使權知絳州刺史公外摠方畧內修班制
當強弩之末無半菽之糧不忍加賦飛章未下猶以憲
度爲已任推剽者斃不行師諸校譁張觖望至是夜暮
變起或以跳驅諭公公曰吾之不敏當死節官下安敢
貳偷以煩刑史亂之剡也公竟及焉議者尙其絜矩而
哀其不淑時上元三年建卯月春秋四十八是歲改元
寶應至夏五月寧神于三原縣之北原詔以揚州大都
督印綬告第憫其勞也公本諱若幽上元中天子以特

立之操爲宗公表率錫嘉名以更焉公忠儉誠厚方嚴
密靜用儒行憲令修明事功大玉不劇楚金必割凡歷
官二十四自解巾至握節勤職十七其以內庭持書中
執法亞丞相佩兩印以雄外服者又七命焉刺房陵之
後五六年間車不輟鞅賦職任功名聲章明及公以司
徒總輿師令弟若水以內府司贊謁而太夫人福履所
介也陳壽鵠懷黃佩玉左右溫清極魯侯之燕喜邁張
仲之孝友宜錫壽寵爲人倫龜龍曾未中身遭罹凶害
前史稱霍去病亦有天幸然則命之所賦有幸焉有不
幸焉斯不可問已夫人扶風郡君竇氏鴻臚丞光之女

揚府長史御史大夫餽之姊也淑明仁順克叶公志家
肥族睦抑有助焉公薨若干年而夫人歿子四人長曰
錡材氣碩茂潔廉貞肅遵修訓則復大其門入作卿士
出爲侯伯貞元十五年以御史中丞剖符潤州宣風以
宏禮俗成賦以殖財用大績茂焉中邦賴焉明年就加
御史大夫十八年進禮部尚書撫封題劔如公渥命次
日鑑蘄州刺史次曰豐士鄴縣令幼曰豐器長安縣尉
皆有幹裕而屈於年位今尙書永惟先公丕矩未刻金
石以德輿嘗叨史職久掌贊書知王族大僚之事業見
託論讓故不敢默其美亦不敢溢其言銘曰

堯睦九族漢封同姓烈烈淮安乘時佐命淄川而下三
葉儲慶乃生我公紹續先正時惟崇英忠智廉清所至
風行所居理平山元朱組旣靖蜀京鉞鉞凋戈乃主夏
盟交修藩衛纂服宏天陟恪左右勤勞翼戴隱微之間
乃與禍會夷途始半白晝中晦桓楹羽葆久闕鮮原煌
煌密章肅肅絲言盛德復祉叢滋後昆列郡是式介人
維濟大江南服考禮修職五曹十聯克嗣先德董是經
費陳之藝極本於教忠懋此宣力伊昔祭器實銘蒸爨
禮則有變魂遊在茲連崗陂陀宰樹參差悠悠終古永
揚斯碑

卷第十六

權載之文集卷第十七

唐灌德與字載之

碑銘

唐尚書度支郎中贈尚書左僕射正平節公裴

公神道碑銘 并序

王者奉三無私以勞天下則崇德報功加恩飾終與覆
載照臨相爲用一也惟正平節公以愷悌文敏爲二千
石尚書郎人浮於食位不配德纂積厚之緒業貽克家
之燕翼流光裕蠶爲代師式乃元和五年夏五月
追命告第爲尚書左僕射孝本乎忠榮生乎哀用摠罔

極以刻金石云公諱倩字容卿河東聞喜人其先嬴秦
同姓因封受氏魏晉已還號爲多才八賢方駕百族歸
重自魏冀州刺史徽五代至中軍將軍雙虎中軍五代
至隨左光祿大夫皇朝贈原州都督忠公仁基忠公生
皇銀青光祿大夫禮部尚書定襄金牙兩道節度行軍
大惣管贈太尉聞喜憲公行儉公之曾祖也憲公生皇
光祿大夫侍中兼吏部尚書宏文館大學士贈太師正
平忠獻公光庭公之王父也忠獻公生皇尚書祠部員
外郎贈太子賓客稹公之烈考也公天資宏裕虛受通
理臧氏之有後於魯管氏之代祀於齊遠至之器發於

岐嶷年十一以相庭推恩授家令寺正滿歲選部銓第

甲乙補太常寺主簿居先府君喪漿水不入孺慕殆於

滅性宗門憂其死孝經一作禮文俯就衣服外除歷華陰

馮翊二郡司戶參軍轉秘書郎俄丁內艱毀瘠如初禮

違難江介就拜洪州司馬改太子司議郎徵爲殿中丞

侍御史拜度支駕部二員外遷司勳郎中秘書少監歷

信饒二州刺史復徵爲度支郎中其佐鍾陵也領留府

之重居議郎也贊計司之職暨登中臺亞中秘皆兼柱

下方書之任自淮而南涉江而西荆衡漢沔湘中夏口

半天下與壤爲都府者十數公四顯使車連佩數印督

楷書之文集卷之七
課郡國調其盈虛吏祿兵食之仰給輸將轉漕之回遠
法錢牢盆之制田租口賦之差權其輕重商其功利察
下人之疾苦廉長吏之善否車不輟鞅有勞於時其始
受命也寇劇橫厲三川如燬陰方出師慕義助順代宗
焦勞念慮命德宗以雍耶總戎賦輿所曾征繕不給有
詔輟東方軍市之租移用于中都屬受鉞之臣矜功觝
望師老專利便方自營公慨然牒書議切備至向之廢
格悉用平鐫義夫以之感激王族以之震耀其理信州
也用寬惠誠厚輯柔所部稽事滿野嘉生同穎年以順
成人斯洽和復其庸亡五千室闢其農耕二萬畝交代

之日不書於籍且曰吾以恤隱豈當沾美不伐之善欲
蓋而彰方帥表理行第一增秩至正議大夫加金印紫
綬其爲饒州屬所代者非其人因緣權幸貪猾無
狀公以廉平頒詔條以慘怛撫痍傷四封愛戴如熱斯
濯其後徵拜也朝廷誅內臣修百度彌綸經費委重有
司公以郎吏代故相第五琦專判度支事方冀裁成九
賦超贊六職以美利利斯人人望日大天胡不惠以大
厯七年秋七月考終命于長安光德里第春秋若干以
某年月日歸全于萬年縣神禾原之大墓禮官博士以
公處難不謀其身牧人不私其功能固所守以行制度

易嘉名以旌行禮也惟公直而溫簡而文才裕於物器
周於用靜若著龜動如千鎔秉是貞厲終焉節適著文
集十卷溢城集五卷比興屬和聲律鏗然引拔參佐皆
一時名士風采賢材邁絕羣倫齒位未極爲薦紳所痛
夫人京兆韋氏扶風太守恒之女以太宗之冢婦諸侯
之內子矜輦承訓籩豆助祭當室以敬睦親以仁姿操
卓淑音徽宏大盛德著乎母儀惠心通於佛乘五蘊不
入六姻是憲始封咸寧郡君後三追錫至邠國太夫人
有子曰均以御史大夫工部尙書尹正荆門節制上游
就加吏部尙書尙書右僕射元和三年抗章入覲眞拜

右僕射判度支加秩金紫光祿大夫由河東郡公進封
郇國歲中進左僕射同中書門下平章事撫征漢南臨
長諸侯惟郇公直清宏重有文武貞幹得時大行爲王
室輔慮善以動官修其方賦政以惠南國宣威以靖西
蜀師長百工阜成中邦兵符相印焜耀章灼樹善程能
之績勤身體遠之用居則有猷動則有功率循風訓以
履尊大君子曰憲公忠獻公之休烈丕矩再世盛德屈
於即位必復之慶其在是乎初郇公之受律也孝文追
贈公絳州刺史其進律也順宗贈公禮部尙書今皇帝
永懷義方於是有左揆之命公之績慶郇公之孝思可

謂至矣。郇公以三代論譔，皆上合雄文，猥以通奮，忘其卑鄙，辭則不腆，庶傳信之無愧焉。銘曰：清尚善公，蓋宗河汾之東，慶祉所鍾。公相歲黜，德輝昭融。矯矯節公，體仁循性。乃貽後昆，實稟先正。大尉經武，大師翼聖。施于儲賓，執德之柄。公用循良，惠于三邦。公有德澤，宣于四方。急病尚仁，履險乘剛。化被煩苦，斯焉樂康。吉祿方摯，壽堂以闕。藹此家聲，揚于令嗣。恩崇鼎鉉，績茂師帥。中外服勞，安危注意。便蕃屬任，宏大名器。孝理是覃，義方所自。九原之中，禮盛服充。王三錫命，綈飾宗工。連崗崢嶸，介原穹崇。陵谷有變，令聲無窮。

唐中散大夫殿中侍御史潤州司馬贈吏部尚

書沛國公武公神道碑銘 并序

種德考祥，賢人積厚之業。尊仁安義，君子揚名之孝。其敬養也，諭之於道，其貽慶也，教之以忠。宏保乂於元臣，集寵靈於追命。見之於尚書武公矣。公諱就，字廣成，沛國人。周室之興，本於忠厚。趙王之裔，厥有動賢。元魏步兵，尚書鴈門。朔方雲中，馬邑四郡太守。始啟封晉陽田祿，蓋大生國子祭酒。受陽公神龜，受陽四葉。至太原王諱華，太原生鄼國節公諱士逸，節公生河間郡王諱仁範。河間生潁川武烈王諱載，德代以文武上才為將軍。

二千石識芒碭之氣密贊皇圖承沙麓之祥分封戚里
潁川生考功員外郎修文殿學士諱甄字平一以字行
於時未弱冠有重名閱覽博古爲人文龜玉在天后朝
累徵不起以公族好爵爲懼常晦其明與桑門大士修
無生法中宗復辟用踐周行載筆論思恃盛淵雲之選
賦詩感激必以呂霍爲誠雖位有陟降而道無磷緇叢
滋後昆纂服遺烈公卽考功府君第三子也肅而寬簡
而廉忠方抗直純厚彊固博洽文誼周通憲法始以方
聞之士對詔策佐官衛李梁公峴之守右扶風也表爲
兵曹掾宣皇在岐供侍有勞改永樂令歷河中府戶曹

轂下求吏轉萬年丞建陵復土推擇充奉拜醴泉令朝
廷嘉其才擢爲殿中侍御史修起矩度堅明不回時戎
車方駕泉貨力屈皇華載馳董荆衡漢沔之賦以嚴見
憚爲吏議所侵貶柳縣尉移句容丞二地有南嶽三茅
靈僊遺趾於是浩然自得與道爲徒方解纓絡以暢天
理且曰窮與通在吾靈龜耳外物其如予何其道觀察
使挹其風聲薦授秘書郎潤州團練副使入爲京兆法
曹加中散大夫忽忽不樂求爲潤州司馬滿歲徙家嵩
洛愈尙夷曠中朝名卿大夫四方賢侯通人多與公爲
道義之交賈太傅魏公用清靜理東郡以益公待公亦

既戾止俄然化往時貞元六年冬十一月享年八十理命終止視道門儀法以明月之晦降體魄于邙山北原有靈鶴百數徊翔嘹唳其休徵歟其元契歟惟公文學政事泣官十二次冠神羊駕四牡剛腸正詞臨事風生君子之方有迂有合或忌公之直或愛公之才行藏牽乎時而道不屈得喪宜乎已而神益王與張禮部謂元容州結歌詩唱和著文集五卷自有塗中之適異乎澤畔之詞前夫人隴西李氏生長子譚而歿譚爲金壇令士行清修官屈其志繼夫人汝南縣君周氏中書舍人思鈞之孫單父令瑛之女專柔淑慎以正家道有子曰

元衡文行宏懿靜深周密遵道而行有儀可象代天工以和帝載賦明命以贊皇極元和二年春正月由戶部侍郎同中書門下平章事秋八月兼領戶部侍郎事冬十月又以門下侍郎檢校吏部尙書成都尹劍南西川節度觀察西川八國瀘南安撫等使自文水縣男再徙封至臨淮郡公上以井絡之下新去湯火亦旣震耀是圖生殖輟台宰之重爲慈惠之師黃樞金鉉鉞鉞拒鬯旬歲間三錫命恒赫嘉會綢繆樞極信向禮賜冠于羣倫豈非公之道阨而不伸而昌大於後抑義方家法固有類乎公捐館四年而夫人歿其明年臨淮公乃舉公

之窆與夫人之喪改葬緱氏潁川王之兆從先封以叙
昭穆禮也初臨淮王至監察御史而孤其後再爲中執
法朝典覃恩贈公杭州刺史其司大政也再贈公吏部
尚書夫人始追封文水縣太君益封汝陰郡夫人顧復
罔極之報哀榮歸厚之禮成於德器名教稱之臨淮公
考功府君之謫掾于吳也與德輿王考府君有僑札之
契油素斯在清徽未泯德輿與相君交代爲地官小
司徒陪外廷之末議承宰府之寬政有命論譔忘其菲
薄刻茲樂石以表鮮原銘曰

君子之道剛方絜矩或消或長或默或語於惟尚書執
憲天朝密侍殿內肅清羣寮鋒芒肯綮湖海飄颻以恬
養智毋落吾事溜合虛元脫遺聲利題劍告第寵靈斯
備元哀介圭流光所自煌煌台宰天下是毗廕庥岷峨
灑濯癘疵顧此忠力無非孝思緱原峻厚兮幽宅悠久
崔巍介石兮天矯螭首鏤嘉聞兮示厥後

唐故光祿大夫檢校尚書右僕射兼右衛將軍

南充郡王贈太子少保伊公神道碑銘

并序

昔伊尹相湯伊陟相太戊咸有一德格于上帝其

籍以敏辯仕蜀爲將軍伊馥以勇力佐魏爲司空曠遼
綿代復續休緒者曰南充郡王諱愼字寡悔剛毅勇悍

鷹場鷄立勞勤四朝終始一心涉覽春秋戰國策太史
天官五行之書用善射中鵠補廣州綏南府折衝都尉
丁夫人憂以毀瘠聞初公之孤也幼不知先子之殯將
祔二尊日號于天魂交神選盼靈誠感壤而樹之率禮
無違大厯中嶺南裨將哥舒晃盜殺其帥呂嵩賁以亂
竊據府中南方蕭然江西連帥路嗣恭承詔出師命將
孟瑤暨公以討公以水陸士徒分道鼓行晃之謀主蘇
渙騎將王明悅鴟張蟻聚皆據阨害公曰寇不可翫勝
無幸焉毒之酒腊盡在是矣疾力交梓必亟吾中
乃春其喉而潰其腹斬首二千級下韶州其明年戰于

把江口水道湍悍戈船赴起公浮筏寘薪迎風縱焰寇
之燋没于水火者終夕有聲又明年軍于滑口于端州
于潮陽次于廣州冬十月斬晃渙于泔溪揭其首以徇
幕府上功拜連州長史換撫虔江三州別駕建中初德
宗訓齊万方端正百度以梁崇義負阻江漢未嘗會朝
詔東諸侯分道問罪公實領江西偏師而統于希烈希
烈以牒書署公漢南漢北兵馬使公明智牢讓獨率所
部兵大破翟暉於蠻水俘徒三萬以至於斬崇義平江
漢厥功居多希烈愛公愈深公懼之愈切一旦決與數
騎遁歸既而希烈以急變聞且賂公以堅甲善馬爲之

反間密詔嗣曹王卽訊因俾論公如法公方握兵符在境上微聞有命歛手就召曹王挹公名義偉公姿材取酒爲壽交歡感泣手疏上列辯其寃誣委之先偏激以自效乃畧黃梅次長平遇劇賊韓霜露引滿中股斃於萬衆之前其徒相蹂踏死者十七八拔蔡州取蘄州降山寇李良領蘄州刺史剖符爲王加御史中丞興元巡狩之歲使臣底貢次于蘄口時希烈已屠陷大梁遣其腹心杜少誠引勁兵絕江流公以行師七千列樹三柵破之於黃崗少誠遁走斬驍一作騎將許少華封其尸爲萬人冢進圍安州希烈遣其甥劉介靈二唐書作虛來援擊

于應山生得介靈與郭嵩李廷玉降七千人收尸一萬四千人夫婦男女耕桑安堵乃督安州加御史大夫眞食百室二年五月引兵攻隨走康叔夜於厲鄉獲馬牛輜重以益軍實表僞署刺史李惠登爲之刺史終以理行聞十二年用久次就加右散騎常侍後三歲天子以公積功勞使中貴人持命書金印卽本郡授公節度觀察使且裂齊安爲支郡尋詔公兼統荆洪潭三道支兵討叛於蔡敗之於三州港營于義陽戰于申斬級千數有詔班師就加刑部尙書進右僕射今天子嗣位拜章入覲眞授右僕射俄檢校左僕射兼右金吾衛大將軍

坐細故退爲右衛將軍明年復檢校右僕射兼右衛上將軍元和六年十二月晦寢疾薨于光福里不及懸車者二歲追錫太子太保同盟諸侯皆使其命介來弔祠視喪事明年夏五月庚申葬于萬年縣某原鹵簿騎吹如葬禮初公之曾王父皇太子通事舍人澄生左衛長史悅悅生贈太子太保衡公之祖禰也積善餘裕追崇以大惟公以武毅通文理視席楷隸心師自得感槩出倫談事如雲起南方裨校屢陷軍陣勢若猛鷲不辭劇易急病而益裕其才履危而不昧於邪悃幅忠直爲中興名將以至於授英蕩題龍泉有功烈勲勞於天下脫

劔薦紳從容漢廷徼循師長文武三品啟體歸全追榮官師豈徒然哉公之息男十六人其冢嗣曰宥左領軍衛將軍押右神策軍牙門之職能率義訓以揚家聲初公來朝也詔宥以侍御史領安州刺史由二千石入筦南北軍教忠移孝情禮盡在宥以鄙夫與太保同居里閨且以理命遺緘辱徵斯文表諸神道不敢誣也銘曰在殷保衡負鼎而相惟唐南充推轂爲將泔溪之刑嶺表乃平蠻水之捷漢南以清蔡克滔天曹邸鼓行公率武旅迅如風霆斬春安陸連下劇地專城建牙宏大名器交修威懷較著功利介圭會朝脫躡師帥南宮端右

武候緹綺沐浴休明保完富貴歲降婁兮月大呂一氣
散兮無處所繫甲車兮馬鬣封九原夕兮闕音容揭此
介石厥聲無窮

唐故江南西道都團練觀察處置等使中散大

夫使持節都督洪州諸軍事守洪州刺史兼

御史中丞騎都尉賜紫金魚袋贈左散騎常

侍崔公神道碑銘

并序

博陵崔公諱某字某仕至御史中丞洪州刺史江西都
團練觀察使元和七年冬十一月某甲子啟手足於郡
舍享年五十五皇帝不視朝褫以左散騎常侍印綬命

郎吏吊祠明年十一月耐窆于東都河清縣先正之大
墓又明年其孤仲謨纂其代德家法命書愍冊請刻石
繫辭且自本曰炎帝之後秦夏里黃公廓漢東萊侯伯
基東漢長岑長駟濟北相瑗晉左僕射洪之代也洪七
葉至北齊禮部尙書文恭公聖念聖念四葉至君會祖
知晦應銷聲舉授兗州金鄉丞王父瑜朝議大夫忠王
府諮議贈太子賓客烈考灌再爲澧州潭州刺史以御
史中丞領湖南觀察使當宣武之際用愷悌修政爲代
吏賜優詔錫今爵推理行第一神道繆鑿遭罹戕害他
日以君之勤贈太子少師君慈和修絜平粹文敏以勤

身之功善揚積厚之風類始以門廕調河中府參軍歷
邑丞廷史從事察視凡南臺外三爲殿中侍御史嘗以
公事貶台州司馬聯帥表於理下旋以上介入拜侍御
史遷考功員外郎度支吏部二郎中商常二州刺史以
至按部撫封爲太子守臣所居可紀漸漬光大其爲郎
中考課經費彌綸綜覈三劇曹無留事瀕江郡國仍歲
天癘而澗河之東南旱特甚縣官恤然臨遣使臣發吳
之公聚賑越之囂食君受命載馳仁聲先翔噢咻憫怛
布施優裕不樂宴私不嘗酒肴東人鼓舞感動肝膈其
爲常州漕引河渠通申夏二瀆以宣利澤郡有聽斷之

下有如神明及處方任爲仁由已凡封逋負數千萬夫
家病焉君曰不曠然大貸無以休息悉用條上盡蒙可
報然後均列城之田賦去都府之煩弊吏措手足事無
尤違仁矣哉詩稱仲山甫柔嘉維則申伯柔惠且直惟
君亦柔而立溫良而能斷教順導利外寬內明函達于
雅故勤施于政事稽洪範三德其甫申之柔乎凡厯柱
下史東曹郎皆居代官列郡二千石方帥執法皆循風
訓江湖之間壤地相錯蒙君父子仍代之澤豈天意之
裕斯人耶鄙夫久貳六官與君周旋甚熟頃忝宰府詳
知報政迨茲君守而仲暮儼然焉衰疾不文直詞傳信

銘曰

矯矯少師涖湖之南播遺懿兮抑抑常侍在江之西施
美利兮乃代元侯寬明輯柔政樂易兮此物此志四封
茂遂古循吏兮宜永介福奄然厥復左貂襜兮河清鮮
原羽葆翻翻潛智氣兮有涯必盡流此淑聞斯可貴兮
刻飾豐碑崔嵬龜螭永爲識兮

唐故尚書工部員外郎贈禮部尚書王公神道

碑銘并序

今皇帝始初清明永貞紀號追命故工部員外郎王公
爲華州刺史改元元和之明年再命爲禮部尚書裕蠶

之風訓漏泉之慶澤父所以教忠於子臣所以移孝於
君人道之極盡於是矣公諱端字某太原人曾祖景肅
皇澧州刺史祖威德州司馬父思獻襄州襄陽縣令公
方嚴有志尙沉粹潔清不流於俗舉進士宏詞連中甲
科授崇文館校書郎累遷監察御史工部員外郎其於
奉朝請之外或介隴坻或留洛邑以疾乞告遇安祿山
反書聞南游江湖自適其適乾元己亥奄至大病熾夫
自開元天寶間萬戶砥平仕進者以文講業無他蹊隧
薦紳之倫望三臺如登青天公與河南元德秀天水閻
伯璵同歲中正鵠其後冠惠文趨建禮憲章奏議與名

聲俱當時士君子猶以未充量爲嘆其文峻清不滑於
波流者還一齊記惠上人碣銘微妙虛空深入無際嘗
與故太師顏魯公暨柳郎中芳陸員外據殷永寧寅爲
莫逆之交陸嘗言王之莊柳之辯殷之介皆希代鴻實
知言者以爲實錄有子三人長曰綽入道精修爲桑門
上士次曰紆以文行篤實歷右補闕起居郎右司員外
郎庫部郎中又次曰紹本名犯皇帝諱而更焉忠厚宏
裕爲德宗所器歷任戶部侍郎戶部兵部二尚書咨俞
關決過於宰府大政密議須其一言持平以有守樹善
而不伐天下之人謂之長者睿聖繼明以檢校吏部尚

書爲東都留守東都畿內防禦使以檢校右僕射爲徐
州刺史武寧軍節度使元和七年入覲復爲兵部尚書
俄拜戶部事四征六職咥赫尊大故公再有追錫之命
夫人亦累贈隴西郡太夫人龍泉魚軒賁飾于冥冥之
下名教德器有哀有榮孝理之感人深矣初公之捐館
也行次信州瘞於玉山前此夫人歿于洛師窆于潁陽
僕射竭其誠信日月有時矣不幸薨落理命其三子嗣
事焉由是僕射之孫曰門下省典儀元泰試大理評事
攝監察御史元質右威衛倉曹參軍元弼等窮毒在疚
護王父母之轎車間關跋履泣問著蔡以八月某甲子

耐于萬年縣鳳棲原克纂先志禮無違者而又哀請父
黨篆茲祖德永揭神道用愧蕪辭銘曰
懿懿王君黃中有文清時發身舒翼卿雲執憲平明含
香秘粉慶靈下鍾復大其門追錫儀曹徽章顯尊鳳棲
古原龜策不諼泣耐雙魂禮成孝孫刻銘斯碑君子之
墳

權載之文集卷第十七

權載之文集卷第十八

唐權德輿字載之

碑銘

唐故朝議郎使持節温州諸軍事守温州刺史

充靜海軍使賜緋魚袋河東裴府君神道碑

銘并序

春秋時賢卿大夫皆叙其代功舊德章明以績一作續蓋

黃流玉瓚之寶產於深山清廟夏屋之材秀於中林其

或為珩為佩為節為椽無非禮神用修崇構洪河之東

裴氏在焉自魏晉迄今忠賢輩出土林以為領袖史臣

疲于簡策而又奕代降休且公且侯上嬪王姬出領方州者可得而言以刻金石曰君諱某一作希先字某四代祖

懷節皇給事中工部侍郎荆揚二大都督府長史洛州

刺史謚曰定曾祖昭厯司門度支二郎中衛尉太府二

寺卿祖確厯左右衛左右金吾衛四大將軍太府卿太

子詹事平陽郡開國公謚曰貞自定公至貞公皆銀青

光祿大夫以至烈考恠仕至麟一作廊州刺史太子僕贈

絳州刺史凡四代貴仕左曹二千石四衛九列副冬官

尹東朝禮及易名恩深追遠代修其業鍾美於君君寬

裕博厚恭儉莊誠資性端直詞氣閑雅於經書泛爲疏

達而不窮章句於吏道通於理術而不求聞問自解巾

至於捐館凡厯十一官無秕政無違德祇守家法奉以

周旋仕於官朝始爲僕寺進爲洗馬中允再爲家令仕

於王國厯濟陳蜀三府初爲騎曹掾次爲長史次爲傅

其初又爲壽安丞後牧臨邛乃遷永嘉班宣六條撫柔

二郡惠和所被夷越嚮方其在朝也以晁錯之智王陽

之道而滯於散地恬於久次其剖符也仁恕愛禮而不

苟簡奉法循理亦不細苛居三年以疾受代貞元六年

冬十一月没于鍾陵之私第享年若干明年八月返葬

于長安少陵原之舊塋以夫人永年郡主祔焉禮也惟

郡主元宗之孫今皇帝之從祖姑也儲是慶靈生而洵
淑窈窕德象婉婉聽從備柔嘉之行成肅雍之道初天
寶十三年詔選資地才令以府君有安仁武子之美而
下嫁焉齋莊以主中饋和樂以宜姻族作配君子禮同
家人嚴祭祀服澣濯者三十六年而歿春秋五十八歲
貞元五年也鍾陵之守臣以聞上不視朝卒禮有加嗚
呼以公之率履永年之仁淑宜其蕃祉老壽子孫繩繩
而生不極其道歿無主其後此伯道之痛碩人之詩所
由作也遺命以兄之子某爲嗣乃列其祖代官伐請刻
豐碑辭之不獲乃繫辭曰

河東右族蕃衍紹續代功世祿昌而熾兮乃生永嘉剖
符承家實而不華諭於義兮二邦靜謐禮之善物朱幡
赤弗亦爲貴兮有齋永年作儷仁賢佩玉鱗然四德備
兮天漢之尊平王之孫爛其盈門恭祀事兮返彼元壤
少陵之上終古悽愴金石識兮

唐故成德軍節度營田副使正議大夫趙州別

駕贈壽州都督河間尹府君神道碑銘

并序

詩之小雅曰尹氏太師秉國之均大雅曰王命尹氏戎
我師旅然則代爲天子三公大夫參掌文武故吉甫有
作憲之美翁歸爲兼備之才周漢以還似續忠厚今義

武軍節度使相國延德郡王司徒公之從事曰澄從公
來朝朝有賞典式寵戎輅當簪法冠永懷罔極之恩願
迴追錫之命司徒嘉焉以其詞列上先皇帝孝理天下
愀然曰俞繇是輟功次之遷遂飾終之澤迺三月丁酉
有詔贈澄之先人正議大夫趙州別駕鈇爲壽州都督
先夫人吳郡陸氏爲吳郡太夫人印綬璜珩光耀幽窆
哀榮所被名教多之澄又稽甲令釋家謀以漏泉告第
之恩有螭首龜趺之制於是傳詩而系辭云都督以諱
爲字天姿剛健經術百氏陰符六韜皆所講習通其旨
與天寶初舉進士不第幕府上功盧龍府別將稍遷瀛

州高陽縣令歷恒州司法參軍臺城令寶應初以太子
中允兼恒州長史錫金印紫綬廣德中遷易趙二州別
駕節將推其才表爲營田副使理二縣佐三郡勞徠安
集周爰圖慮以饑饉之歲丁師旅之殷敷其慈和得以
安靜議者以魯仲堪龐士元方之旣重大田實居上介
俗知禮節師以阜饒方陟勞課奄然大病以大厯七年
秋七月啟手足于恒州靈符里享年六十一以明年夏
五月窆于藁城縣東子樂原夫人嵐州刺史道之孫密
雲令昌嗣之女能以仁順洽于宗姻晝哭旣除喪十四
歲以貞元四年冬十月歿于道州以十一年冬十二月

耐焉從魯禮也有子三人長曰渾唐縣尉次曰濤趙州
司功參軍皆不幸短命澄卽其幼子也尙學理文敏信
誠厚雅有惻愍不隨波流山東士大夫多稱其名義由
北平尉爲定州功曹掾辟司徒府主其謀猷每懷戎章
驅疾傳陳賦輿之事明利害之鄉叶于中權皆有功效
洎元侯入覲天子錄功賓僚傳校命賜優重而澄永懷
霜露願賁邱封感于宸衷盛此徽數君子曰是舉也有
以見尹氏之孝思都督之流慶上公之與善元首之加
恩以風四方以厚士教雖澄之未貴仕其所以宏助者
多矣初都督之禰曰本古仕至常州武進尉武進之父

曰正義歷許相宋三州刺史司農少卿司農之父曰良
終滄州司馬司馬之父曰文哲仕隋青泗曹濮陝宋洛
相等州刺史本郡太守大理卿戶部尙書皆有德善揚
于官業蓋二雅遺烈之所從來遠矣德輿門人蘭陵蕭
籍與澄爲寮同在公府狀其往行兼列命書忝貳邦教
敢忘聳善乃爲銘曰

尹氏代律聿修文武自周綿漢炳耀圭組懿懿都督遠
承丕矩方騁夷途俄歸野土慶延嗣續職佐藩垣遠從
上台來朔天門追飾二尊輝榮九原密印畫綬隼旗魚
軒官纔掾吏跡重知已恩迴大君澤及先子以盡忠養

以宏孝理揭立貞珉芳馨在此

唐故右神策護軍中尉右街功德使開府儀同

三司守右武衛大將軍知內侍省事上柱國

樂安縣開國公內侍省少監致仕贈揚州大

都督府孫公神道碑銘

并序

元和元年冬十月內省少監致仕孫公寢疾薨于京師
廣化里私第享年若干十有一月有詔追贈揚州大都
督法賻布絹各以百數明年十一月葬于涇陽縣之某
原命婦諸孤家老故吏以服勞詔祿恩華慶賞之不可
以不識也請鏤豐碑揭于鮮原云唯聖唐仁澤汪濊威

靈輝耀乃法辰象以嚴武師惟肅宗創新軍于北落克

靖患難惟德宗置中護于內朝而為總制翊震嚴以宣

七德正師律以張四維勤勞警巡東拔忠厚不失於正

克保其終者惟公有焉公諱榮義字某其先吳郡人也

軒裳延耀本冠邦鄉服籍推遷口來京轂今為京兆涇

陽人曾祖翼皇右金吾衛中候祖庭玉贈兗州刺史父

知古皇開府儀同三司行右領軍衛大將軍知內侍省

事上柱國魏國公或徽循筮仕道在安卑或麾節加恩

義彰追遠以至於先公貴位名重前朝宏內省之事任

受又封之徽命承休襲慶終踐代官裕盡教忠備遵家

法公端良謹重潔白詳明事無尤違心必誠信至德中
 策勳至上柱國起家掖庭局監轉掖庭局丞宮闈局令
 再為內謁者局叙品至朝議大夫恩錫章服又加中散
 大夫貞元十七年充右神策軍護軍中尉判官纔浹辰
 遷內常侍充副使越翌日兼右衛功德副使十九年拜
 右驍衛將軍充右神策軍護軍中尉右街功德使明年
 有詔知內侍省事歲中加特進右武衛大將軍封樂安
 縣開國男德宗弃天下順宗諒闇整訓爪牙勤宣翼戴
 進驃騎大將軍益封樂安縣公食邑一千五百戶今皇
 帝踐祚以年疾加侵固辭戎政重違誠懇恩禮舊勞拜

開府儀同三司既積沉恙累章誠乞乃下優詔遂其致
 政之請焉初公以大厯中奉使交廣裔夷膏禍有梁氏
 尋氏聚為寇數公與守臣決策潛師盡殲南服以清厥
 猷茂焉建中中將軍許庭遊將命北蕃公為之介屬張
 光晟虎斃其衆與陰方為仇野心頗言將遲憾以報才
 全智免終靡盬而歸俄而希烈干紀淮瀆不靖受中省
 合兵符取桂嶺湘川之衆益漢陽夏口之鎮以當劇賊
 且護成師收應山援安陸凡鄂之成績公有助焉尋又
 監慶州行營兵馬皆奮策畫用寧邊鄙暨大拊循爪士
 參贊禁營乃昇副車超踐中尉講軍志循武經比詩人

折父之職得易象貞師之義承睿謀以決勝援羣師以
懋功肅肅然安人而禁暴雄雄然由中以制外積勞不
伐受寵若驚恩波深而守以慎懼爵祿厚而不盟侈汰
其或方國問遣歲時交煥公曰有齒以焚古人所誠無
脛而至廉士不居外不異於人中不易其操泛然虛受
悉助軍實強力匪懈推誠在公或籍在行間而法干吏
理苟簡書所至必械繫送之心無私焉直而後已當親
重之任護腹心之臣入近天子之光出列諸侯之上豈
徒然哉先魏公信嚮釋氏薰修心法嘗於邑里奏建寶
應衆善寺五代之壤樹依焉至公又請於寺內置無垢

淨光法華三院塔額檀施賊獲爲淨人者十輩所以修
先志所以崇佛乘孝子信士斯爲至矣昔漢室以灌嬰
爲謁者隨何爲護軍正伯參珥貂之制環列據銜珠之
重驃騎儀同品皆第一護封益食事軼常均及屏去燠
灼翛然恬曠家居得謝以至沒身其動也本兵柄而不
可犯其靜也冥道樞而無所累納忠循理議者嘉之前
夫人郭氏驃騎大將軍贈開府儀同三司全羽之女克
恭婦道不幸先歿今夫人東平郡君呂氏柔嘉有儀晝
哭遵禮奉終誠信以前夫人耐焉長子某次子某官某
等棘心雪泣銜恤無怙趨承軒禁嗣續忠勞公之兄前

保壽寺上座內供奉監義大德道系捨筏之宗已超學
地在原之痛猶切孔懷公之弟某官某等同氣聯華致
美有裕忍哀襄事先遠是圖龜兆告猷芻靈啟路卜佳
城於此室體魄焉依轉樂石於他山聲塵斯在銘曰
大君御極修理百職抑抑樂安逢時竭力超侍軒墀抱
公絕私乃將命令以會師期保合誠信周旋險易韜鈴
講貫印紱歲蕤帝座之西星文昭晰鉤陳之北武旅森
列爲之總制所以關決凡在拊循士皆感悅委重三朝
成功九霄退身崇讓息偃迢迢逝川闕水截道驚颺恩
崇幢蓋吹咽笳簫涇流湯湯谷水池陽舊邱崇崗若斧

若堂宰樹如雲仁祠在旁刻銘于茲兮永永不忘

唐故義武軍節度度支營田易定等州觀察處

置等使檢校司空同中書門下平章事贈太

傅上谷郡王張公夫人鄧國夫人谷氏神道

碑銘

并序

皇帝以文明御方夏以德禮序人倫貞元十一年秋九
月詔侍臣德輿以故義武節度檢校司空同中書門下
平章事贈太傅上谷郡王張孝忠夫人谷氏之淑行內
則俾刻金石臣聞風有采蘋采蘋易曰中饋貞吉所以
表柔明於內子昭節信於元侯宣力獻功抑有其助夫

人之先魏郡昌樂縣人也在漢元成之代衛司馬吉以
勲勞致命於絕域大司農承以文學盡規於本朝前史
書之以勵臣節四代祖邠律皇朝諫議大夫宏文館學
士正直之道播於清時曾祖輔袁左羽林軍長史祖倚
相秘書省正字仍代藏器晦而不輝考崇義天寶末有
行師北鄙之勞累書勲伐至左金吾衛大將軍兼殿中
監贈特進夫人卽特進府君之第八女也稟是明封鍾
于女士淑閑之度中外宜之初太傅始自軍校建功河
朔克彰婦順敬贊宗事正位于內尚柔有儀洎太傅自
易部領常山遂分節旄以至相公上畧兼資於明智中

壺載揚其惠和二姓有輝六姻是 盡綸翟之飾動珩
璜之聲建中元年封魏郡夫人三年進封鄧國夫人旌
淑哲也鵲巢之均一家人之悔厲籩豆敬齋之色琴瑟
靜好之儀夫人備有焉惟堂畫吳良弓繼志上慈下厚
就養無方此又令嗣之能致其敬也貞元十一年冬以
門承勲績之崇恩有選尚之貴方築外館聿來上京十
二年二月丁卯以疾終于萬年縣安仁里私第享年四
十九遺章上陳敬而得禮皇情憫惻恩賻有加嗣于茂
昭義武軍節度易定等州觀察處置等使起復左金吾
衛上將軍檢校工部尚書定州刺史兼御史大夫延德

郡王博陵上谷之師以續休緒戎車委重優詔抑情次
曰茂宏雅王府司馬茂宣舒王府長史嗣雍杞王府諮
議參軍嗣慶試將作少監御史中丞幼曰茂宗銀青光
祿大夫行光祿少卿員外置同正員駙馬都尉皆以純
孝裕盡居喪執禮以其年冬十月甲戌奉夫人之轎車
葬于京師少陵原不耐舊封式遵古道恩延戚里有命
從之初夫人之兄從政實傳戎韜之訓以中執法剖符
定州有姊四人所天皆貴異姓之社從夫以尊公官之
教率性而中象服交映魚軒並馳其後婚親無非勲德
故太尉中書令西平王今大尉中書令瑯琊王皆夫人

之姻也納徵佐餽焜燿一時此又閨門之盛而積善有
類也柔正之風本於王化愷悌之澤洽于幽泉此臣所
以拜受德音銘諸樂石銘曰

在漢子雲侃然中正昌言獻可遠緒傳慶降及特進策
勳斯盛乃生夫人如玉之溫婉彼淑質宜于盛門金鉉
石窳所從益尊亦旣晝哭道彰訓育中權之貴克繼藩
服下嫁之榮方承湯沐生也有涯壽胡不遐奄然冥漠
喪此柔嘉遽返黃壤空悲白華秦原隱嶙丹旒徐引此
焉幽宅自昔同盡追琢徽音終古不泯

唐故太清宮三洞法師吳先生碑銘

并序

雲出於山遊於天復歸於自然先生之道似焉涵泳乎道之樞倘佯乎物之初以生爲蘧廬復返有而入無先生諱善經縉雲仙都山人也自曾王父而下皆質誠孝敬登聞於鄉黨先生未成童博貫儒書讀道德經至爲學日益爲道日損三復恍然曰吾知之矣改習四真靈寶等經年十七本郡以制度居縉雲山其後遍登匡廬天台三茅句曲泛然不囿於物虛已以遊代乘彼白雲至于帝鄉時宰王黃門將爲太清宮使奏隸宮籍乃從冲虛申先生受三洞經法貞元中於宮院立仙壇躬上士勤道之誠宏大君受釐之重陰功幽贊何可勝言德

宗錫以纂節幡珮靡有不備初冲虛之師曰清簡泉君泉君之師曰來君來君之師曰萬君皆有遺像在開元觀先生乃茲焉冥息立申泉二碑以發天光以極師道凡儒元宿學有道仁人貴遊象服男夫女士傳三景真籙者五百餘人一旦謂入室弟子曰天行物化吾之晦明其動也與物皆春其靜也與化爲一成形待盡吾何爲哉乃於畢原近郊修露仙隱景之地元和甲午冬季朔旦齋沐潔清與其徒元言終日越三日焚香朝拜泊然返真明年正月寧極於露仙館某年八十三矣其受道也有反風晏溫之景其委化也有清香靈鶴之祥斯

又不可涯已嘗以爲無心者與物冥則未嘗有對於天
下順性命而遺耳目其在是乎其餘奔走於蹇淺倒置
之中吾不爲也所注道德經并著文二十篇元覽至頤
通乎微妙嗟乎先生之容不可得而見矣先生之言不
可得而聞矣但糟粕具在神明不滅采真者得以虛心
道門威儀趙常盈偏得先生之學與符洞幽周元德晏
元壽董太珣等或關尹受教或庚桑爲役有年數矣吳
郡歸冲之廣平劉素芝天水權載之皆從先生遊者也
元德狀其崖畧授載之以金石刻噫嘻老龍吉死矣安
所發予之狂言哉乃銘曰

萬情弊弊繆繳之內先生懸解遐視區外族系于東吳
稟靈于仙都演道于明廷棲神于太清隱機于開元歸
根于露仙其來適然其去寥然大圓清兮大方厚元鄉
返駕兮無何有刻介石兮茲不朽

唐故章敬寺百巖禪師碑銘

并序

禪師長老百巖大師之師曰大寂禪師傳佛語心法始
自達磨至于惠能之化行于南服流于天下大抵以五
蘊九識十八界皆空猶鏡之明焉雖萬象畢陳而光性
無累心之虛也雖三際不住而覺觀湛然得於此者卽
凡成聖不然則一塵瞥起六入膠固循環回復於死生

之中風濤火輪迷忘不息授受昭合大師得之一言宗
通深入無礙師諱懷暉姓謝氏東晉流寓今爲泉州人
孩提委發博究書術一旦慨然曰我之祖先今安在耶
四支百體視聽動用孰使之然耶漼然兩泣故服緇褐
志在楞伽行在曹溪得圓明清淨之本去妄想因緣之
習百八句義照其身心心離文字化無方所於是抵清
涼下幽都登徂徠入太行所至之邦被蒙法味止於太
行百巖寺門人因以百巖號焉元和三年有詔徵至京
師宴坐于彰敬寺每歲召麟德殿講論後以病固辭十
年十二月恬然示滅其年六十其夏三十五弟子智朗

志操等以明年正月起塔于灞陵原凡一燈所傳一雨
所潤入法界者不可勝書著法眼師資傳一編自雞足
山大迦葉而下至于能秀論次詳實或問心要者答曰
心本清淨而無境者非遺境以會心非去垢以取淨
神妙獨立不與物俱能悟斯者不爲習氣生死蘊之所
累也故薦紳先生知道入理者多遊焉嘗試言之以中
庸之自誠而明以盡萬物之性以大易之寂然不動感
而遂通則方袍褒衣其極致一也嚮使師與孔聖同時
其顏生閔損之列歟釋尊在代其大惠綱明之倫歟至
若從師受具之次第宰官大臣之尊信誕生入滅之感

異今皆不書德輿三十年前常聞道於太寂聿來京下
時欵師言頃因哀傷以獲悟入則煩惱不遠菩提雖聚
散於此生期會歸於彼岸銘曰

西方之教南宗之妙與日並照百巖得之爲代導師頌

若琉璃結火燔性愛流溺正癡冥奔命卽心卽佛卽色


卽空師之道


一作通

兮無來無去無縛無解師之化兮揭


茲靈塔丹素周匝示塵劫兮

權載之文集卷第十八





博載之文集卷第十八



吳今皆不書提其之平年預將而進於太叔率來京下
時款師言切天良偏
敬於此生期
西方之教而宗之
若琉璃結
即空師之通
茲靈塔外
得之為代導師願
命即心即佛即色
師之化身局

